

東  
華  
續  
錄

光緒一百三十三

臣朱壽朋敬編

臣潘鴻鼎恭校

三月丙申諭據督辦軍務王大臣奏稱上年十月間奉旨招商築路卽有廣東在籍道員許應鑄來京具呈集資承辦當經札飭回粵勸辦現據該員電稱股已集至七百萬兩五月初間卽可到京又有廣東商人方培堃等并候補知府劉鵬監生呂慶麟均稱集有股分千萬先後具呈各願承辦請派大員督理等語廣漢鐵路關係重要提款官辦萬不能行惟有商人承辦官爲督率以冀速成王文韶張之洞均係本籍之境卽著資成該督等督同辦理道員許應鑄等分撥地段准其自行承認毋稍掣肘并著該督等詳加體察不得有洋商入股○諭前據御史敬祐胡景桂先後奏參山西河東監鹽同知張貽琯營私牟利各款迭經諭令張貽琯聘之確查具奏茲據胡聘之查明奏稱張貽琯被參典置莊地開設鹽店縱容白役加價霸運各節皆有確據實屬嗜利無厭貪鄙不職河東監鹽同知張貽琯著卽行革職候補知府徐秋與張貽琯通聲氣調護掩飾平日藉勢招搖不知檢束候補鹽大使孟起鳳行同市儈有玷官箴著一併革職以示懲儆○戊戌大學士額勒和布致仕○諭軍機大臣等近聞廓爾喀與西藏失和意欲決

戰廟悍而附英藏愚而奉佛勢必不敵廟若得志全藏將不可問著鹿仲霖速即揀派熟悉藏務之員馳往設法解散勿令起事藏既恃俄爲援則廟之動兵必係英所主使該督留心邊事應如何措置之處著籌議具奏○己亥 上還宮○祭 先農壇行耕藉禮○庚子雨○上御文華殿與國使臣比田布祿古覲見○壬寅 上幸頤和園詣 慈福端佑康頤昭豫莊誠壽恭欽獻崇熙皇太后前詣安駐蹕○癸卯調隆慶爲正紅旗滿洲都統以長庚爲鎮藍旗漢軍都統○論軍機大臣等有人奏酷吏濫動非刑逼傷婦女一摺據稱庫倫辦事大臣衙門司員承審已故扎薩克台吉車林多爾濟之妻妾爭產一案拷審扎薩克之妻擅用酷刑肢體成廢又復妄造供招拖累多人請飭查辦等語著桂斌確切查明據實具奏原摺著鈔給閱看將此諭令知之○王文韶奏天津武備學堂兩屆期滿請將在事出力員弁及屢考優等學生照章擇尤給獎允之○王文韶奏天津創設武備學堂挑選各營聰穎弁兵入堂肄習兵法僱募德國兵官卓貝爾期米脫那凱芬艾德等四員又工程錫綸一員充當教習分課武備鐵路學現在兩屆二年期滿請分別微給寶星允之○甲辰 上還宮○乙巳張之萬因病續請開缺不允予假兩月調理○丙午總理各國事務衙門奏光緒二十二年二月十一日准軍機處鈔交御史陳其璋奏請定教案章程一摺奉 旨該衙門議奏欽此查原奏內稱西教行於中國分天主耶穌兩門教民良莠不齊往往滋

事近來每遇教案各國公使節詞狡辯要挾多端從前津鎮及上年川閩各案卽爲明證辦理教案向無專章故各國得以逞所欲爲若與各國先行議定則在我自有遵循謹擬十條等語等查西教傳入中土窮民每藉入教爲護符包攬官事詭詐鄉愚民教積久成仇遂至迭釀巨案各國使臣復藉端要挾衙門目擊時艱亟圖補救曾於庚午天津教案後酌擬教案專章八條一曰教堂不准設立育嬰堂應由地方官自行辦理二曰不准婦女入堂並不准女修士在中國傳教三曰教士應歸地方官管束遇有教案教士不得干預四曰教案祇應照案定罪不得再議賠償教民犯罪教士不得庇護五曰教士領護照往某省傳教不得潛往他省並不准偷漏稅項六曰教堂所收教民應報明地方官按年造冊備案七曰教士應遵中國體制不准僭越八曰教士買地建堂應報明地方官有無風水壅礙契上寫明教堂公產不得駕名他人各等語鈔寄前出使法國大臣崇厚令與該外部籌辦衙門復與各國駐京使臣酌核乃各國均以條約所無不能應允遂令夏法美意經久無成今該御史所議十條與衙門原擬大有不其相遠然事有已經議行者有難爲照辦者如原奏內開教務宜實成總教士應令各國公使於教士中舉出一二人駐京爲總教士一切教務教章由總教士呈請總署議定等語等查西洋傳教向無總教士名目惟羅馬教王可與有約之國專派教使凡天主教民悉歸管轄現在教王勢弱意大利法蘭西

諸國復將教王權力多方裁制教王僅擁虛位履行教士實議請中國與教王立約等語權衡其事利害參半教王派使可免法德各國藉保護爲詞遇事挾而教民概隸教籍中國地方官不得過問亦非保民之道故數年來教王之約迄未與商至耶穌教則英美兩國爲多久與天主教分門別戶外洋有新教舊教之稱其實與流同源教規各立而已今若設總教士名目無論兩教不能強同一遇教案轉多一總教士從中作難是徒增口舌無益於事又原奏內稱教堂買地宜查照舊章同治初年定章教堂買地須先報明地方官契內寫明教堂公產字樣地方官始能蓋印近來每私賣於教士並不先報地方官以致一切公產因而私售地方官不肯蓋印教士遂執契來爭請申明舊章等語臣等查教堂買地先報明地方官一節係臣衙門於同治四年因案咨行江蘇巡撫曾有此語並非與法國訂明條款是年法國使臣柏德固與臣衙門定議專章本無先報地方官字樣各省每多誤會前年法教士呂推案起法使施阿爾執柏德固原議來爭臣等以章程內既未載明頗難援案及論因於上年通行各省直省仍照柏德固原議辦理後恐漫無限制因與施阿爾商議如過國家禁地且閭公產不准互買以杜朦混侵佔之弊現正與磋商尚未定議又原奏內稱教堂處所宜造冊呈報總督通行各省查明教堂是否洋式華式房屋若干按年冊報現聞各省間有不報者應令地方官造報等語臣等查通商以來教堂林立漫無稽考臣

衙門於光緒十七年通行各直省分別詳查冊報但查地方房屋不問教規近今數年俱已冊報嗣後倘有遲延未報者應由臣衙門咨催造送備查又原奏內稱教民人數宜造冊呈報教民受傷身死往往索賠卹款其人果否入教無從查考應令各教堂將入教之男婦僱用之華工開具姓名報明備查等語臣等查各國教士均有護照可憑易於查考至教民人數眾多造冊不易若各府州縣概令造冊恐徒滋紛擾終難清釐而民教從此多事至教民受傷身死議給卹償該地方官必詳細查明方允給償斷無任教士影射之理又原奏內稱教民犯罪宜將教冊除名入教華民大率敗類一經入教魚肉鄉民應令教堂將犯罪教民永遠除名不得迴護等語臣等查華民甘心入教見異思遷斷非安分之人健訟欺人在所不免教士每倚爲心腹恃作爪牙一遇闕礙必相袒護數十年來臣衙門辦理教案從未見有教士濫罰教民之事今若令教堂將犯罪教民永遠除名恐陽奉陰違終無實際如果情真罪實臣衙門必力與各使相持能否就範卻無把握又原奏內稱教民被控傳案教士不得阻撓教民被控地方官自應按冊指傳教士無得隱匿等語臣等查條約載明中國習教民人凡中國律令之事仍由地方官照例懲辦現在各省地方官指傳教民尚未聞有抗傳不到情事似可毋須另議又原奏內稱傳教地方宜重申禁地山東曲阜爲聖人故里恐洋人前赴開堂設教應將曲阜地方照蒙古西藏等處一併歸入禁地等語臣等

查洋人欲赴兗州府傳教蓄意已久經臣衙門駁論多年堅持不允現在德國使臣紳到照會言明兗州府城不設教堂惟教士安治泰有與地方官商辦教務之事請准暫行進城由官代覓房屋居住妥為接待臣等查兗州府不准建堂傳教本未載明條約該使臣執約來爭我轉無詞以對因函商山東撫臣李秉衡大意總在不允建堂其餘小節似不妨通融辦理刻尚未准撫臣安定辦法至該御史請照蒙古西藏歸入禁地一節查蒙古各地方均有教堂西人多往游歷西藏現亦議准通商均非禁地似可不必援引又原奏內稱教堂不准育民間嬰孩教堂有嬰往往布散謠言懷疑激變應令該教士無須收養等語臣等查教堂收養嬰孩其意本為行習無如杯影弓蛇漸疑莫釋及至查辦究無戕害實據每令洋人有藉口光緒年間督臣張之洞曾奏請按月派員赴教堂查看嗣因各國使臣均以為不便迄未允行又原奏內稱教士入境宜先驗護照洋人出外傳教均由該國給發護照方准來華若赴內地傳教亦須令地方官驗照方准放行等語臣等查教士來華傳教須驗明該國護照方准入境為約章所無若到內地傳教均由臣衙門發給護照業經歷辦有案又原奏內稱教士入境宜歸地方官管轄查公法無論土斯土自外來者皆當歸地方法律管轄應由總署商諸公使通飭教士以台公法等語臣等查中西異教中國與各國立約均無管轄教士之條中外交涉皆以條約為憑其為條約所有者可據以力爭其為條約

所無者自難強辨若於條約之外另議新章須俟換約之年與各國訂明庶無軒輊得 旨如所議行○  
丁未陝西提督雷正綰緣事解任○王文韶奏欽差光緒二十二年正月二十三日 上諭張之洞奏南  
洋開濟鏡清寶泰南瑞及福建福靖各兵輪遵有調防北洋上年十一月間陸續行抵旅順後煤餉各項  
轉運爲難請改由北洋支應等語即著王文韶查明各兵輪所需餉精煤炭各欸就近按月接支以省周  
折原摺著鈔給閱看將此諭令知之欽此○查南洋奏請改撥自因各船調北轉運爲難起見計開濟鏡  
清寶泰南瑞四船月餉銀一萬三千七百餘兩福靖一輪月餉銀一千四百餘兩統共歲需銀十八萬一  
千餘兩油煤雜費尙不在內北洋海軍失事後原有各船月餉早經裁削停撥目下經費均按實在用欸  
請撥供支歲額有常無從籌此鉅欸應請山部另籌第當此供餉浩繁之際合各該船原有之餉另行請  
撥恐部庫支絀籌措亦極爲難且旅順內澳地窄水深未能停泊多船春融後北洋飛霆飛鷹康濟建靖  
四船卽當陸續北來擬請俟該四船到旅後南洋五船仍飭南下各回原防現計該五船月餉自本年二  
月分起至五月底止共四箇月約需銀六萬餘兩油煤雜用無定數約一二萬兩共銀七八萬兩據海防  
支應局詳請奏報前來合無仰懇 天恩俯准飭部籌撥銀八萬兩以供支放下戶部議奏○戊申王文  
韶奏續略創造之初既費巨帑常年營工煤火亦屬不貲加以鋼軌道本年久必當更換非將車腳進項



力求整頓量入爲出則養路修路又將糜費帑金殊失 國家推廣利源本意臣查津榆鐵路自自治至山海關官辦工程每歲所入車腳時或不敷開銷而自天津至古冶向所謂商路者歲入之項除開銷外尙有盈餘推原其故蓋有免票不免票之別查官路車腳從前雖有免票權其公私緩急尙不過濫自軍務紛繁商路酌收半價官路則概給免票不取分文兼之轉運糧械遞送文報絡繹不絕軍事業已告竣文武各員猶復相沿成例動輒請領免票其間包庇隱射均所不免現在商路歸併官路並接修山海關以外之工軌道加長歲時需費更鉅若長此濫付免票其將何以支持亟應嚴申禁令擬嗣後除調兵運械放賑三大端免收車腳外其餘地方文武因公差及各路防營採辦糧米料物馬匹一切轉運概不得率請免票卽調兵運械放賑應行免收者亦須由衙門札飭總局遵照辦理不得私相授受如此明定章程庶可保此鐵路爲持久之計總期歲有贏餘陸續歸還工本方爲公家之益下所司知之○己酉上幸頤和園詣 慈靜端佑康頤昭豫莊誠壽恭欽熙崇熙皇太后前請安駐蹕○庚戌以鄧增爲陝西提督○壬子 上幸圓明園看馬獵○還宮○電 諭饒應祺等賊近就擒恐煽誘良回聯成一氣回衆如能捍禦殺匪出力打仗著著破格獎勵以杜勾結○鹿傳霖奏 臣欽奉電傳 諭旨覽鹿傳霖奏西藏情形殊深靡系奎煥已令來京訥欽到任未久一切操縱機宜著鹿傳霖馳函商酌或據派熟悉藏務公

正明幹之員隨同訥欽辦理俾資贊助至瞻對焚驚不馴尤須妥爲開導毋激事端欽此欽遵正使員赴藏聞三月初三日又奉電寄 諭旨近聞廓爾喀與西藏失和意欲決戰廓悍而附英藏愚而奉佛勢必不敵廓若得志全藏將不可問著鹿傳霖速即揀選熟悉藏務之員馳往設法解散勿令起事藏既恃俄爲援則廓之勦兵必係英主使該督留心邊事應如何措置之處著籌議具奏欽此等因當由五百里飛咨駐藏大臣查詢並飛札 復藏都司耿紹宗確探實在情形迅速馳報伏查印藏番界爲期甚迫而藏番愚闇爭執事難就緒此時忽有廓藏失和之報是廓之勦兵必係英人主使仰見 聖明洞鑒萬里之外伏思英俄交窺藏地蓄意已久而互相猜忌皆憚於先發今藏已通俄恃以爲援故敢於爭持界務若界不定英將以兵至藏必乞援於俄則英俄且明明因藏互爭矣蓋英不欲明露與俄失和之形故嗾廓與藏搆兵藏斷難敵必乞俄援英即從旁觀衅而助臣竊揣英之用心必出於此然廓雖附英而亦忌英決戰之說或屬虛聲姑徇英之意以恫喝藏番若得一通達機變具有膽識諳練洋務之員先往廓爾喀爲之詳陳利害勸令釋嫌修好或可聽從庶藏境暫安妥商番界以免生事惟徧察川中人員殊難其選適有三品銜分省補用知府李毓森因接辦電局來川謁見臣與接晤數次察其人頗明幹膽識俱優前在朝鮮辦理電局商務有年熟悉洋情因語以廓藏失和擬派員前往解散妥慎籌辦之意該員情

股報効不憚險遠因與討論辦法所陳均合機宜洵堪任使擬即派往妥辦當即先行電奏惟由川陸路入藏臺站節節險阻更換馬夫非數月不能達再由前藏至後藏赴廓爾喀又須月餘計需半年之久實屬緩不濟急查已革雅州府知府蔣志文前奉派襄辦藏務會航海取道上海香港新嘉坡恆河海口直達印度孟加拉登岸乘輪車至印度交界之獨脊嶺入藏故此次議令航海亦取此道前往兩月餘可到以期迅速且探得山獨脊嶺鐵路輪車已可直達廓境更為捷近并由川陳派熟悉藏務得力員弁隨同前往該員道經上海尚須覓洋緝譯前往以期通達語言而昭妥慎惟李毓森違涉重洋籌辦票務所有輪舟輪車往返僱價及隨從稿費一切需用浩繁必須寬給公費薪水可否援照出使之例於重慶洋關出使項下照四品副使例月支薪水銀七百兩以資應用仰懇 天恩飭下總理衙門戶部核議飭遵一面先由川庫墊發銀八千兩交該員收領應用事竣核實報銷勿許少涉浮冒一俟廓藏案結即飭該員就近隨同駐藏幫辦大臣訥欽勒導帶界事宜至新授駐藏大臣文海處已電催迅速來川旋據復稱四月初由黔起行俟其到川臣與面商妥籌一切即可馳赴藏任相機妥辦再川藏相距萬餘里難迅速消息不難昨謹電陳擬趕修電綫先由成都至打箭爐再設接展入藏以速邊報所需經費查前川省創修電工時籌款十萬存總辦電報道員盛宣懷處可以撥用勿須另籌現款奉電 旨准飭照辦遵

卽派員勘路購運綫料趕辦以速文報奏入奉電 諭飭查委員李毓森由海道駛往究竟取道何處審  
詳覆藏地情形仍著確探○癸丑王文韶奏准統領武毅全軍直隸提臣聶士成咨稱衣准挑足淮軍馬  
步三十營改爲武毅軍仿照西洋德國營制以期練成一枝游擊之師惟既改習洋操則平時軍中應設  
武備學堂軍械所藥庫醫院爲講習武備醫疾病之所估需工料銀二萬九千九百四十六兩七錢八分  
一釐納具工程圖說清單咨請核發前來臣查該提督所部武毅軍分紮蘆臺一帶參用西法延聘洋教  
習訓練業經臣奏明在案並聲明以後如有應行變通籌章增添款項之處仍當隨時奏咨以符部議近  
年防軍積習武備全不講求領用軍械子藥任意棄置漫不經心一遇兵勇疾病亦視同罔奈越不關痛癢  
該提督請設立武備學堂專選年輕識字勇丁教以測算術數鎗礮理法並化電聲光諸學以爲儲才地  
步械所藥庫爲慎重利器及屬藏子彈要件醫院以養病勇均爲西國兵家必不可少之需一覆加確查  
所估工料銀兩尙無浮冒已咨東征糧臺如數給發應工下部知之○甲寅命理春副都統恩祥仍隨同  
長順幫辦吉林邊防一切事宜○丙辰 上幸頤和園詣 慈禧端佑康頤昭豫莊誠壽恭欽獻崇熙皇  
太后前請安駐蹕○總理各國事務衙門奏 光緒七年奏定寶星章程內開頭等第二給各國世  
子親王宗戚等頭等第三給各國世爵大臣總理各部務大臣頭等公使等通行各省歷經遵照辦理在

案近日邦交加密 頒賜寶星之案比舊增多洋員職分崇卑不能不詳悉查考以免畸重畸輕之弊近  
接出使大臣許景澄函陳洋人爵分五等其首等曰潑林次略如中國王爵爲世子及近支親王通稱而  
近支親王與疏遠世襲之王體制迥異親王禮同諸侯世爵但據以標門望官秩並不加崇如各國駐使  
之世襲者卽授世爵大臣字樣越請頭等寶星恐無以爲酬獎彼國宰相部院大臣之應請於章程內  
立案聲明頭等第二寶星專贈給各國世子並近支親王凡例與王爵者不在此例其頭等第三寶星應  
以部院大臣頭等公使爲斷庶二等公使有爵者不能援照等語等擬加查核所言甚有條理與原奏  
慎重釐定分別等威之義亦屬相符惟事關奏定章程應仍奏明請 旨如蒙 俞允卽由 臣衙門立案  
通行一律遵辦得 旨如所議行○丁巳 上還宮○戊午 上詣 奉先殿 壽皇殿行禮○己未福  
潤奏安徽省前經兵亂田畝荒蕪自同治年間定章舉辦開墾已非一次上年欽奉 寄諭鈔發委散秩  
大臣信恪奏稽查荒田一疏經 臣督同藩司申明前定查荒章程通飭各州縣銜詳細撥勘限年墾復於  
覆奏籌議時務摺內條列彙陳在案近又札催司道會同覆議率屬力行茲據署布政使于謙霖按察使  
趙敏異署安徽滁和道潘汝杰會詳稱錢糧爲 國家維正之供本不容絲毫欺隱安徽省民衛屯田共  
計三十八萬二千一百四十頃有零每年額徵丁漕屯折等項正耗共計一百七十餘萬兩光緒十三年

以前民欠未完荒災業經豁免不計外自十四年至二十年共荒缺二百四十六萬八千餘兩災緩二百四萬六千餘兩共短四百五十餘萬兩缺額之鉅異乎尋常若不澈底清查更恐日虧日甚本省歲入之款漸不可支兩月以來延見現任及曾任州縣數十員逐一諮詢或陳本屬情形或籌全局辦法該司道於地方之肥瘠籌辦之難易詳加體察以究其情再三辯詰以窮其變誠以積弊已久非合衆人之心力不足挽回非舉通省之張弛不能措手也夫從前定法本已周詳何以年復一年罕有成效知非盡舉行之不力實由於荒歉災隱情僞百端而又困於文法絀於財力溺於議論限於歲時遂成積重難返之勢請先緩晰冒之潮自髮捻削平垂三十年地利所在人爭趨之豈有任其拋荒之理皖北間有土饑穫薄因而廢置者皖南間有地曠人稀未盡墾種者其內皆確有荒數兵燹後鱗冊既失版籍不清紳族榮宗交相侵佔以多報少以熟報荒地方官明知之西不敢過問平民習見之而相率效尤積而愈多官恐激而生事未收核實清量之效先蹈辦理不善之咎亦遂隱忍不發然平民可以欺官府而不能朦朧吏刁徒若輩執持其短需索其費既得暗中分肥即便扶同徇隱而鄉民之狡健者又復乘間假冒互結渾爭飛灑詭脫無所不至又有一種無家客民春種秋收虛來實返地非本戶冊無戶名直與行竊相同官吏無從究詰此弊之在荒者然也荒熟既不清晰災禍因多渾淆 聖朝軫恤祲災從無惜費章奏朝入

恩澤夕施本望窮簷均霑實惠而有不盡然者州縣之地大率高低多半或此豐而彼歉或水稔而旱荒所遭誠有不同然亦不過一隅也其始已墾之田墾而不報尙未敢諱熟作災瓜分使費捏完作欠留券抵官迨光緒八年潯山等十數州縣同被水災調緩兼行及於寬典自是向不報災者有災矣又十二年朔行民欠徵借冊畸零連賦上下昭彰自是向無民欠者有欠矣每歲例查秋成不肖紳董慣與吏役因緣爲奸先期設簿賣災平民必先出資乃得入冊無錢者雖真災而仍須完糧有勢者既免糧而且食災費州縣稍事詰駁輒以民瘼爲詞聯名上控甚或聚眾滋鬧阻遏輸將必求饕其災數而後已名則爲民請命實則爲己焚財聚強竊役先藉以魚肉鄉人刁生劣監更藉以賂削胥吏此其弊本不在州縣而州縣既不能禁又各自顧考成或且陰利其資輒據情具報請勘無論年穀豐歉災例率是爲常先是藩司署內設有豁免局專辦因災遞緩恩詔豁免之錢糧積少成多大虧正賦此弊之在災者然也荒弊矣災弊矣更有糾紛愈深顛倒愈亂者各州縣本未實辦賑務虛詞報荒則其應納之課遂於歉災案內設計彌縫是其弊在官民間持徵借冊爲憑苟所納租賦已及上年卽於未完之款任催罔應短數視爲應欠緩戶誤作免徵是其弊在民二弊維均獨非其甚也紳富倚勢恃符每遇開徵隨意封送銀兩謂本年之所應完就此了結餘欠概置不理此外有全不投納者有包庇多戶總納者有以清平交納者有但完

正項而無火耗者州縣畏其勢力弗與爲難故必隱捏災情爲騰挪緩徵之地至來歲豐稔例應帶徵仍以備災虛報請緩帶徵積歲累年祇候 聖恩豁免莠民榜樣胥吏總符胥於是乎在縱使耗土盡闢仍於 國課無補此又非荒非災迫之捏災之弊然也他如鳳陽錢糧定價之不足解費徵收因之短絀霞邱山瘠地薄向以十數畝併給一畝不得以荒額論或沿自前明或襲於周案另須設法變通者更無論矣要而言之南荒多而北災夥統以三年比較荒則南居十分之六而北尙有其四災則北居十分之九而南僅有其一論查究弊竇紳士難於民戶論虧侵額賦災隱甚於荒欺蓋匿熟作荒刁民賄分餘潤胥徇輕捏熟作災正供轉飽私囊罰難貸現在統籌辦法計惟有一律勘丈乃可荒熟分清賦歸實在然欲普量荒田尤宜先除弊竇比肩秧田播種履畝行丈有礙農時擬於五六月間先布嚴諭舉凡捏災做俗實成該管道府州縣認真確查不准稍有混飾并揀員前往密查務使向來諸弊剔除淨盡然後自九月間爲始開首丈量惟是法莫先於正始愚莫大於畏難清丈之法一而其要之在外者有三一曰籌款丈田事理繁重需費滋多前著山西荒旱原任廣東撫 馬丕瑤時在該省丈解州一屬最稱得法然亦兩年始舉費自官籌安徽亂後彫敝紳多富而民實貧此項通省清丈非使衆情鼓舞咸樂其成不爲功擬將隱匿之田無主之地新淤之膏腴仍照前次詳定章程分晰繳價悉歸丈田動用其不足之數無論富



家貧戶一概不取分毫均由官籌補但司庫除地丁以外別無開款可籌原不輕議動撥第此舉爲復額而起果其丈清賦復數十年之後卽以進款之半計之約亦可增三十萬兩 國家以一歲多收之數興百年經久之利見爲用所當用未可愛惜而不爲應懇 特旨允准在於司庫地丁項下酌撥濟用作正開銷一曰用人清丈荒田人地不宜未能濟事人力不備亦難成功皖南先有鹽務局甫經裁撤未便再設擬於省城特設一局總理其事非有綜核名實清慈愛民之員不克勝任擬先儘本省遴選委用併擇別省明幹循良賢聲素著者奏調來皖以資匡助庶策舉集不至腹脹貽誤一曰執法荒災糾互叢弊已深一旦發其病根窮其利藪必有劣紳刁胥勾通一氣謠言蜚語動多中傷或抵拾他事具控省垣或捏造危詞倩人參奏皆在意料之中甚且嗾令頑徒阻撓環鬧致煩兵力彈壓稍涉畏葸必致廢於半途亦應先事奏明倘有違抗把持各種弊端一經察實無論紳民生監立予從嚴究辦懲一儆百令愚民之有所鑒而要舉克竟其功其要之在內者亦有三一曰寬丈法錢糧考成例章甚重一不足數革參降調旋踵而至安徽州縣罕有侵吞入己之弊多有藉災挾官之累如歙縣知縣單光錄因不肯辦災民懷嫌怨致帶微有欠由部降級開缺該令旋卽抑鬱身故州縣莫不引以爲戒崇捐益得挾以逞私其他辦災則譽之不辦災則毀之猶其小者今辦清丈先責人與地宜如須擇員調任或與定例不符並應請 旨

飭部嗣後安徽省有關清丈事宜如官員之補署奏調以及荒熟之變遷帶徵之分數報銷之出入皆勿拘以成法一俟丈辦蒞事卽行改照舊章一曰定民志此舉屢議屢輟已歷多年總由上畏繁難下多浮議一官一令官移令廢觀望遷延徒啟小民玩志殊不知裕國利民之政莫切於此且此事但期核實並非加賦但爲釐剔欺隱并非有意苛求擬請不分紳戶民戶首先實報者卽予免丈已往不追倘有如前項刁紳屆期阻抗及捏詞攔奏卽分別指名嚴參重懲飭將田產充公仍復治以應得之罪再部頒民欠徵信冊式歷年造辦所費不貲無益庫款另行詳請具奏援案停造以節浮費而杜窮民莫倖之心若丈田一事以後本省大吏卽有更動必仍由後任續辦持之以久矢之以堅使通省紳民共知有不清不止之意庶各官乃能專一從事而浮言不得動搖一曰勵人材法令固宜從嚴獎勵亦宜並用皖北黎庶沐浴列朝厚澤深仁孰不知感清理田賦是乃復其固有初非增所本無其在公正紳耆當不乏通知大義卽鄉壤里保當亦具有天良自應奏請在先各屬紳衿有能倡率鄉里勸導愚氓不勞官力而復額者准予從優獎敘印委各員有能不畏疆禦不辭勞怨而卒底於成者亦准切實保薦破格錄用務使人心思奮日起有功以上六端乃通省之樞紐全局之綱維缺一不可擬請 特旨宣示俾欵由此出極由此歸官吏紳民咸懷奮勉一面由省頒發告示曉諭一切辦法將荒災各弊層層揭出欺隱罪名一一列明

并嚴飭各州縣逐細查明積年弊實，在情節明白稟陳，寬其既往之愆，嚴其將來之罰。隨時斟酌因地制宜，以前詳定之法，宜遵者遵之，宜易者易之。先令承行之事，役將底冊從實報明，并飭納糧之花戶將契據先期呈驗，或全丈或抽丈，或先民丈而後報官丈，或但丈荒以清熟，或兼丈熟以實額，或造順莊魚鱗冊以垂永久，或繪各里總散圖以期分明。該管州縣或自辦或請員，或推原保甲或聯絡正紳，或重減稅契以示體恤，而使踴躍悉聽便宜行事。縱未能刻期竣事，必可以漸次推行，其畝分大小之殊賦則輕重之異，統按各屬舊式不事更張。既丈之後，不准州縣再借災區為挪移彌補之計，不准再將紳富欠數暗嫁小戶以病民。民稀田荒者，准其續開聽民自便地瘠利微者，緩其升科。留民有餘報墾，仍荒者查實以寬閭里之迫，呼解額有虧者酌減以恤牧令之畏累。總期有益國計無礙民生，抑尤有懇者我朝子惠黎元，超越前古，而尤莫大於恤災與不加賦。兩政並能，固結民心。安徽雖承平三十年，然至今物力尤艱，元氣未復，荒歉災疴固由政寬則慢而旱乾水溢亦由地利不興，河道堤岸無款，溶溶修塘墾溝無款，疏鑿山田無開墾之資，淤壤無廓清之力。夫清丈出於必不得已，國家藏富於民，當應思損上益下之方，行補弊救偏之道。查原任大學士左宗棠於浙江巡撫任內，克復杭州後，奏准截留盤金二成辦理地方善舉，用能百廢俱興，擬請朝廷俯念安徽民情困苦，援照浙省成案，所有將來增收錢糧，永留三

分之一爲地方興修水利之需他事不得動用庶水旱有準備災荒之弊不禁自除於財富尤多裨益等情具詳請奏前來臣維凡有可興之利應盡力經營尤以濟賦強荒爲當今切要之政該司道等詳揭荒歉災隲弊端日久相沿情形屬實自非澈查底裏不能使宿障一清所陳辦法六端亦復切中窺要合無仰懇 天恩俯如所請俾得經費有著任用得人懲勸兼行寬嚴相濟堅持定力期在必成庶不敢徒託空言而可漸收實效如有未盡事宜再行隨時集議奏明辦理得 旨如所請行○庚申 上御文華殿英國使臣寶納樂覲見○諭前據御史齊蘭奏參雲縣副都統謙光貪黷營私各款當諭令王文韶確查具奏茲據奏稱謙光被參各款均無實據惟旗營挑補馬甲該副都統止恩弓刀挑補並未驗看騎射究屬錯誤密雲副都統謙光著交部察議騎騎校崇慶查無朋比款賄情弊而該縣躁進物議沸騰實屬不知檢束著卽行革職以肅營伍○任道鎔奏臣於光緒二十二年正月十四日承准軍機大臣字寄本日奉 上諭前據工部議覆御史胡景桂奏請將山東河南兩省河工變通辦理山東黃河一切事宜巡撫兼轄已久現在李秉衡業經撥款購料妥爲修築至河南七屬修守工程現在春汛屆臨正關緊要任道鎔仍著馳赴河南將現在應辦工程認真經理河督移駐濟寧有無窒礙究竟兩省河工應否酌量變通之處並著任道鎔體察情形通籌全局奏明辦理將此諭令知之欽此又於正月二十四日承准軍

機大臣字寄本日奉 上諭前據工部議覆御史胡景桂奏請將山東河南河工變通辦理當經諭令任道鎔體察情形奏明辦理茲據御史熙麟奏河督必轄全河河南山東不宜歧視請飭另行妥議一摺著任道鎔到任後仍遵前旨悉心體察一併妥籌具奏原摺著鈔給閱看將此諭令知之欽此仰見 睿慮周詳爲兩省河防計者至深且遠欽感莫名 臣維我 朝之設河督也其駐紮雖屢有更易必在全局緊要之區如今之東河是已言官以豫東兩河無分輕重是以有河督兼轄全河之請部 臣以豫東兩河應專責成是以有河督移駐濟寧之議蓋以河南則數載安瀾山東猶頻年決口特爲此變通之論以期籌策萬全 臣才識謏陋詎敢妄抒臆見有所避就於其間惟 臣於兩省河工昔曾親歷此次道經山左再蒞東河體察全局情形有不得不直陳於 聖主之前者東河南岸三屬計長二百餘里北岸四屬計長二百四十餘里河寬十餘里設文武屬汛分汛設防每汛不過數十里南北兩道分任其事河督總責其成當年南北兩岸十五屬自銅瓦廂決口以後祇有七屬其時軍事方殷歲款不濟壩漸塌而埽日多工雖短而險迭出數十年以來如驛工如無半工如漿工多則費帑千餘萬少亦數百萬如最近鄭工費至一千二百萬堵築既遲災害尤烈黃河變行祇在瞬息之間不得謂已治已安稍存疏懈 臣到任後復周歷七屬查南岸各工上南中河臨黃埽段綿長最爲喫重下南次之歷年大工皆由此出攸關東南數省之

安危北岸各工詳河下北臨黃帝段北南岸略繫黃沁衝輻次之大汛將臨河督駐工督率道屬員弁來往稽查防守不容一日稍鬆誠如該御史熙麟所奏河南之河不決則已決則其患必十倍於山東是通工之夷險不在道路之長短也此臣體察河南河工之實在情形也若山東河工則異是此河名曰大清自曹州而濟南而武定至利津鐵門關入海計長九百餘里咸謂南河全溜溜入河身僅寬里許並有不足一里者節節坐灣十數年間沿河居民自行修埝防護遇年淤高自長清濟河以下河心飽滿未至海口而水已難容動輒漫溢同治十一年築侯林踰年築賈莊以後官督民修派勇分上中下三游防守因民埝而加高培厚民埝紆迴尙復此堵彼決防不勝防臣於撫東時知山東河患未已曾派熟悉河工之員自上游濮州蒞澤起至海口利津止令其乘舟測畧寬深丈尺而知此河有三大病焉曰曲曰淤曰窄猶之人身痼疾奏效無期 聖主座念民憂屢派大員賈勛光緒八年挑工竣事又蒙 簡派部臣游百川赴東會同撫臣陳士杰奏辦全工繼以撫臣張曜百計圖維此十餘年間築堤濬河堵口建壩除奏撥官款不計外開已費帑一千一百餘萬迄今並無成效猶然潰決頻聞此非謀事之不忠實亦人力所難至惟歷年爲患不至如東河之甚耳此臣體察山東河工之實在情形也臣受 恩深重自揣精力尙可勉力求於河務有益無論專管統轄必當力任其難萬不敢自耽安逸無如桃伏秋三汛正河工緊急

之時河督駐工修河此數月間卽專管河南兩岸四百數十餘里河工已有日夜不遑之勢今議統轄全河無論東境五屬創始勢所難行卽使照東河成法規畫井然事事應手而濟甯離河南工次約五百餘里離山東濟南武定中下游最要工次約七百餘里伏秋大汛河勢頃刻變遷顧此則失彼斷非一人所能兼籌亦非一人所能通制臣遵 旨通籌全局再四思維河督移駐濟甯固屬窒礙難行統轄全河亦係鞭長莫及臣實未敢遷就貽誤將來且黃河自入東境已四十餘年皆由歷任撫臣應機籌策緩急可恃呼應較靈臣實身當其境非敢爲適度之辭況常年海州無警似未可以兵事僅見一概例之現任撫臣李秉衡素抱公忠其才略實有過人之處臣愚以爲東境河工之治與不治不係乎河督之設與不設應仍歸巡撫兼管以一事協而免紛歧惟開鐵門關業已淤閉海口改道韓家垣又改道呂家窪應請旨飭下山東巡撫相度地勢每年添籌經費將海口設法疏濬順水歸槽使之暢行無滯是亦補救全河之要策也 上諭前據工部議擬御史胡景桂奏請將山東河南河工變通辦理熙麟奏河督應轄全河請飭另議先後諭令覆奏茲據任道鎔奏稱河督移紮濟甯窒礙難行山東河工應仍歸巡撫兼管等語自係實在情形河南山東兩省河工應仍照歷年辦法署河道總督山東巡撫各專責成認真經理以一事權而免貽誤至疏濬海口一節著李秉衡酌度情形奏明辦理○辛酉 上幸頤和園詣 慈福瑞佑

康頤昭豫莊誠壽恭欽獻崇熙皇太后前請安駐蹕○諭奎順奏回匪窟往古海蒙古貝子力戰陣亡請  
旨優卹一摺西寧上庄地方前經官軍將回匪擊敗後該匪窟擾害海蒙古貝子納木希哩帶兵截擊  
衆寡不敵該貝子力戰捐軀又陣亡章京阿音奇一員死事情形實堪憫惻蒙古貝子納木希哩素本章  
京阿音奇均著交該衙門照陣亡例從優議卹以慰忠魂○壬戌 上還宮○以潘瀛爲南澳鎮總兵○  
甲子許景澄奏兵力之強弱外患之動靜繫爲自遼海軍興戰守不利中外論者審湖兵事得失無不以  
仿用西法訓練新兵爲今日當務之急現在天津新建陸軍議聘洋員教習江南防營募用洋將帶隊漸  
已見諸施行願臣愚以爲此猶一時之圖而非經久之規根本之計也查泰西陸軍之精推德意志國爲  
最德制通國民人至二十歲無貴賤皆入營爲戰兵每兵學習行走步武放鎗測準以及守望巡邏之事  
以千把總爲之教習而都守等員督視之在營三四月後始與練熟之兵合隊操演由本隊合於本營再  
由一營以次合於一軍凡走陣變換鎗準遠近兩軍對攻郊野露宿等事皆令各兵一一嫻熟每兵大概  
十閱月而學成二年期滿則令歸家聽調另簽及歲新兵補額其聽調之兵每歲調操二次以資訓練至  
二十七歲則除免戰籍改充守兵約計德國戰兵常川在營六十萬人有事調集可得二百萬人日本仿  
用德制在營戰兵約七萬人調集可得二十萬人蓋以年限操其進退兵數雖多而餉項不至過費兵皆



壯丁而老弱不汰自除其法至周亦至便也中國各省綠營久不可用所募勇丁率係游民一經遣去蹤跡無可稽核年限之法勢不能行惟滿蒙漢八旗之制凡隸於旗者皆可爲兵正與西制盡人當兵相合同治初年創設神機營改弓箭爲洋鎗春秋二季出屯郊甸又與西制入營練習相近特選補營額向無年限充兵歲久選鋒之軍漸成衰弱之侶而騎騎營暨各項甲兵器械仍沿舊制但藉口糧以資自給尤與綠營同一廢弛夫法不能積久不做所貴因時轉移之耳今誠酌議章程旗民至二十一歲過神機營兵缺擇身軀合度向無疾病者以次挑補常年住營悉照西法練習以三年爲期期滿撥歸騎營等營聽調每歲酌期照神機營操法調閱又六七年作爲差滿改給養育兵餉贖之終身庶在旗壯丁皆得及時自効年滿之人仍免閒散失所行之數年京營十數萬之衆皆成得力之兵視募練勇丁去留無常者利便殆遠過之臣之所謂變通整頓者此也至兵既練成而帶兵將校不諳西法調度譬之散錢無串仍歸無用德國武秩分官弁兩途均先入學堂學習算法繪圖格致等事得有考憑始准入營凡充弁者再入弁學堂學習二年然後補缺自守備以上爲官必有學堂優等考憑赴營觀考中格始准留營至六箇月後乃補官缺其都司以上等員另設武備學堂選材甚敏練者俾令入堂講習以四年爲期凡攻守機宜將帥韜略咸有指授非曾入是堂升擢不得至提鎮並選用之詳慎如此查八旗子弟聰明果銳類不

乏人擬請選年十七八以上文理通順有志經武者先在京教以德文並算學繪圖等事滿兩年後派令出洋或送學堂或自延洋師接習二年由領帶官察看德文西學大略明曉即請授以五品武秩俾與德制武員相準商請德廷派入德國軍營隨同操練在營兩年或調回中國酌補營隊各官或察看材識較深者另送德國武備學堂講習三四年學成回京酌補高秩俾備專閫之選大約歲費十萬金足供五十人川資膏火一切之用俟調回及半仍行續派補額十年以後成就日衆千城爪牙充列 禁衛豈不愈於借才異國乎議者謂湘淮宿將起自田間累立功效何嘗規模西法始操勝算不知尙氣敢戰之士可以賊內訌未足以當外侮泰西行事專從學問而出彼致其精而我恃其粗一旦有事焉能與敵是未可狃粵捻成迹而概論之也臣之所謂選儲將校者此也夫京師居天下之重京營強則風氣易振畿輔實則觀視不生建威銷萌必自此始得 旨著督辦軍務王大臣會同八旗都統妥議具奏○是月英吉利國新簡駐華使臣寶訥樂抵任○比利時國使臣陸爾業病卒參贊米師麗署理○美利堅國使臣田貝如日本參贊田夏禮代理

夏四月丙寅朔時享 太廟 上親詣行禮○上幸頤和園詣 慈福端佑康頤昭豫莊誠壽恭欽獻崇熙皇太后前請安○還宮○彭述奏自強之計實以講求武備爲先臣風聞各營扣餉缺額所在恆有雲

南江南安徽奉天廣西等省經該將軍督撫先後奏參或請革職永不敘用或請降調在該將軍督撫體念時艱極力整頓固已破除情面其有原請降調奉旨改革職者皇上權衡至當尤爲欽佩莫名臣更有請者近來將領提鎮居多無可再升遂絕進上之志缺分較少升授頗難官職已至一二品而未經升授彼若不以爲榮卽令升授有期而祿俸所入不如統領所入之多故有補缺多年並非得力統將而仍留帶防營如衛汝貴者無非意在戀棧求滿慾壑縱有發覺之日革職永不敘用亦若不自顧惜且一日有弊既短兵勇之餉又以短額之營驅之赴敵兵勇必懷怨望不願竭力以衛其主卽令臨時補足未經訓練見敵必逃統將勢孤將恐不能自保平日扣餉缺額罪止革職永不敘用猶可坐擁厚貲置身事外驕奢淫佚縱其所爲在忠勇廉潔之統將固明致身之義勞瘁莫辭其贍貪而扣餉缺額者趨避極熟飽則思颺反以永不敘用爲得計相習成風已非一日以致提鎮以下與夫文職之爲統將而不知自愛者視爲固然亦復不免所以上年雖有雲南參奏之案而江南安徽奉天等省繼之今年廣西又繼之雲南雖參付紹枚等而張以仁繼之江南雖參馮士元而沈茂勝等繼之劉祖賢等繼之安徽雖參周雲田而徐思忠繼之層見疊出幾無已時皆由懲治從寬不足儆一戒百當此時勢萬難之際外而強敵環視要挾甚多內而回匪未平偏災時有皇上宵衣旰食一息難安統將帥師徒飽私家罪惟度支奇絀糜

餉可惜且短額之營不足以應緩急尤爲大局所關所有武營扣餉缺額等弊相應請 旨敕令刑部嚴  
定罪名嗣後如敢再犯定行按律懲治 上諭御史彭述奏武營扣餉缺額積弊已深請嚴定罪名一摺  
著刑部議奏○諭御史彭述奏近日軍營積弊營官公費統領並不給足僅酌予薪水兵勇衣裝等項以  
及軍營應用之物無不由統領按名分給任意苛派請飭嚴禁等語國家養兵既用其力當恤其艱帶兵  
各員自應與士卒同甘苦方能衆志成城若如所奏統領營官逢厝盤剝懈軍心而滋貽誤實堪恨嗣  
後統兵各官如有藉端苛派等弊或經糾參或被告發定卽嚴行懲辦決不寬貸將此通諭知之○丁卯  
予故廣東水師提督鄺紹忠照提督軍營立功後積勞病故例從優議卹戰績交國史館立傳○己巳鹿  
傳霖奏川省地方東西南三面皆接夷巢遠越馬邊山披我邊距內地較近者皆分駐防營扼要廣  
紮刻刻嚴防夷匪雖不時出巢均立卽剿擒安撫其馴良夷支則散給賞銀宣布 朝廷恩德以示懷柔  
責令領目約束夷衆其強悍頭目則擇尤卡禁用以羈縻多歷年所初且無事而沿邊之土司環繞星羅  
漸肆鴟張茲查打箭爐所屬之霍爾章谷土司汪青瞻係於光緒十八年病故無子其兼祧子麻普土司  
扎嘉旺甲娶朱窩土司索諾木多布丹之女爲妻翁婿不和乘汪青瞻登病故之時其女卽將其印信號  
紙案卷攜回朱窩收藏稟經打箭爐文武屢次催交守提朱窩土司不特不肯交出且敢聲稱往投瞻對

番官理論前督臣劉秉璋當將朱窩土司摘去頂戴勒限清交乃朱窩土司恃膽對爲護符日久藐抗臣到任之後迭次勒限嚴催仍復抗玩如故上年冬間該土司等各帶土兵互相爭鬪燬掠草谷漢民二十餘家經角洛噶達兩汛弁帶兵彈壓解散回巢臣等正在嚴飭查辦本年二月間朱窩土司又復調集土兵並稱勾結膽番派兵相助將攻打章谷土司地方打箭爐文武迭次派員開導匿不見面抗不遵諭經該文武屢請設法查辦以安邊民前來臣等再四籌商雖膽對隸藏管轄邊僻固不可開而土司原係內屬乃敢以附從膽對挾制法事未可姑息養奸現已先委候補知縣穆秉文前往妥爲開導一面添派候補知府羅以禮酌帶練勇一營繼進駐打箭爐以待倘朱窩土司遵照開導悔悟帖服交出印信號紙聽候斷明自可結案如再聚眾抗玩似不能不用兵查辦以明恤服免致勾結膽對爲患滋大又查松潘所屬川甘交界之打拉子等溝賊番勾結口外包坐雙寨中借等寨於上年十一月間大股出巢搶劫黑河溝居民牛馬銀錢衣物傷斃人命卽經該處分駐勇團開信追捕該賊番輒敢抵敵拒斃勇團該勇丁等奮力攻擊始行敗退回巢查該處賊番近年迭次出巢搶劫均以未受大創兇殘日張地方屢受其害若不認真查辦益致忌憚毫無等據據松潘總鎮稟報以該處地方與甘肅卓尼土司楊作霖地界毗連當經批飭該鎮嚴酌派兵勇馳往查辦妥爲防範並咨陝甘督臣札飭土司楊作霖約期會辦相機兜

捕詎楊作霖未及會辦旋即病故該賊番益復勾結上下鐵卜阿蝦等番鳴張彌甚且現准陝甘督臣楊昌濬來咨亦以該番等勾結爲患約期會辦如不大示懲創竊恐誘發日甚滋蔓難圖據松潘鎮總兵夏毓秀稟請酌帶兵勇三路進兵相機撫辦一面開導附近各番毋得附和滋事等情臣等查該鎮所籌尙合機宜當即飭令妥慎辦理至於贖對本係川屬土司自改隸西藏之後川省卽無統轄之權歷年特其地版人煙羅食土司部落並敢越界與明止搆兵以致附近土司畏其勢力亦陰附之此誠邊境之大憂前經奏明將贖對僧俗番官一併撤參恭錄諭旨咨藏遵辦駐藏大臣譚行商上乃竟依然迴護贖對亦復抗玩不遵臣等迭奉寄諭斷不敢輕開兵衅致釀邊患前已咨明駐藏大臣據派能通番情之漢番各官臣等亦卽派知府羅以禮俟藏中委員到境同赴明贖交界適中之地調集兩造妥爲開導秉公處斷但期贖番不再抗違則此案尙可完結如其情形狂悖應如何妥辦之處屆時再當籌度策畫據實具陳請旨遵辦臣等亦知時艱餉絀未敢輕啟兵端而邊務關係匪輕亦未敢因循玩誤惟有督飭各員妥慎辦理以期仰副聖主綏輯邊隅之至意上諭軍機大臣等鹿傳霖奏章谷朱高土司搆衅擾害不遵開導派員帶兵查辦一摺覽奏均悉朱高土司原係內屬乃敢附從贖對挾制滋事鹿傳霖已派知縣穆秉文前往妥爲開導並添派知府羅以禮酌帶勇營進駐打箭爐以期懾服卽著照所擬辦理總

須該土司悔悟帖服遵斷了結方爲妥善其嚙對番官越界與明正土司搆兵一事並著羅以禮會同駐  
藏大臣所派委員同赴明曉交界適中之地調集兩造妥爲開導如再抗違應如何妥辦之處著該督審  
度機宜奏明請旨主打拉罕子等溝賊番滋事並著該督妥慎辦理將此諭令知之○庚午常雪大祀  
天於 圓丘 上親詣行禮○上幸頤和園詣 慈福瑞佑康頤昭豫莊誠壽恭欽獻崇熙皇太后前請  
安駐蹕○吉林將軍長順因病奏請開缺回旗調理允之○辛未以何長清爲廣東水師提督○李秉衡  
奏准於上年九月復奏開五月二十七日欽奉 諭旨一摺業將東海臨清兩關委員密查有無隱匿中  
飽情弊於摺內陳明在案查東海關常稅正額五萬兩額內盈餘一萬二千兩額外盈餘八千兩歷年收  
數除正額五萬兩外每年盈餘不過六七千兩下短之數照例免六賠四實則報部共只六萬餘兩而此  
六萬餘兩中練軍經費一項卽支銷三萬餘兩再除去各局卡經費七千餘兩解部之數不過二萬兩上  
年協辦大學士臣徐桐條奏謂關道歲入私攤在十萬內外其數雖未必符合其弊實所難免也惟稍習  
相沿已非一日臣上年十一月奏裁練軍片內聲明員非一任應請寬其既往已荷 聖慈洞鑒臣先派  
委員嚴密查訪復飭升任東海關道李興銳核實鉤稽力祛從前微多報少之弊其在外支銷欸內有臣  
署公費銀四千兩先已裁革合計可提出歸公之欸約在三萬兩內外擬請自上年十月初三日李興銳

到任之日爲始每年正額五萬兩額內外盈餘二萬兩並正額盈餘徵耗銀七千兩一併照實數報部不准再有短收暗繳名目此外長餘之銀每年約尙有二萬兩儘數提出報部候撥其銷款之練軍一營經臣奏明裁撤後只請留一哨計可節省二萬餘兩合之報部之數共歲增銀五萬餘兩此東海關提款充公之情形也臨清戶工兩關正稅盈餘共額定六萬二千餘兩向係儘徵儘解惟正稅之外取之於商者名目繁多有名爲監督辦公而實歸書吏坐扣之一分存耗一款有歸濟東道辦公之三分一款有歸臨清州辦公之三分一款又傾費一款收數多寡不等皆隨正稅徵收如正稅暢旺每年外收之款約在二萬兩上下此項本可裁禁惟相沿已久商民習爲固然當茲餉項支絀之時不如化私爲公提充正用擬請自上年六月初三日戶關屆滿之日爲始每年於正額盈餘儘徵儘解之外將各項名目提出銀一萬作爲常年報部之款聽候部撥下餘一萬兩上下提解司庫留充本省緊要公用查歷屆臨清工關收數未能足額均以戶關長收之數抵補據報本年戶關截至三月十三日止已溢收銀一萬餘兩至六月一年期滿除抵補工關外其長收之數約可一萬數千兩卽此亦可見徵收實報之效此臨清關提款充公並正數溢收之情形也臣維關稅之設無異正供所以裕國家之度支非以盈官吏之薪俸自奉行者視爲利藪百弊叢生損下而不能益上殊失設關之意臣習知其弊飭將各關出入關稅澈底清查升任



東海關道李興銳現署臨清州許桂芬亦皆潔己奉公銳意整頓用能力祛積弊補助餉源以後關稅衰  
旺究有不齊而大致當不甚相遠但得經徵者潔清自矢所定之數約可取盈總在辦理之得人耳抑更  
有請者東海關設在煙臺較之津海江海及閩粵等海關其繁盛遠有不逮臨清關更僻在一隅經此次  
釐定東海關歸公之款計增五萬餘兩臨清關提款並溢收之款亦不下三萬兩以此類推其各省關之  
局面較大收數較多者若能實力稽查其可提出歸公之數合之當成巨款可否 敕下各督撫監督於  
所在關稅嚴飭認真整頓以裕餉需之處伏候 聖裁 上諭李秉衡奏遵旨嚴核關稅情形一摺山東  
東海臨清兩關經李秉衡督飭道員李興銳等澈底清查力祛積弊每歲提出歸公款項共增八萬餘兩  
洵屬潔己奉公顧全大局近來各省關稅徵多報少動以常稅短絀為詞積習相沿頗有中飽情弊著各  
督撫監督等澈發天良認真整頓總期核實報部不准稍有隱匿以重稅課將此通諭知之○壬申以延  
茂署吉林將軍○陳寶箴奏湖南制錢停鑄多年民用缺乏生計愈艱擬援案變通鼓鑄核實辦理以維  
圖法允之○諭劉樹堂奏衛署被劫獲犯訊辦等語本年二月間河南林縣衛署被劫當經該縣知縣曹  
晉臻會營追拿格殺賊犯二名先後擒獲首夥十餘名現已飭府審辦衛署重地該匪膽敢糾眾搶劫拒  
捕傷人玩法已極著劉樹堂嚴飭彰德府提犯嚴訊懲辦並飭該縣勒緝逸犯務獲究辦毋任漏網○陶

模奏據探報蘆福祥派道員張成基副將馬安良將北大通收復又據續探官軍實祇得大通營一城四鄉各堡乃係悍回屬聚查回性反覆懸揣情形諸多可慮臣已飛飭潘效蘇會同諸將領進山分紮以資防剿報聞○癸酉 上詣 普覺寺拈香畢還頤和園○諭福潤奏調員辦理勘丈地畝等語山東進士前安徽宿松縣知縣孫葆田廣東駐防漢軍編譯舉人前奉天安縣知縣潘文鐸江蘇舉人候補同知直隸州鄧嘉綱著廣州將軍江蘇山東各巡撫飭令該員等迅速前往安徽隨辦丈田清賦事宜○甲戌兩○上還宮○丙子以翁曾桂爲江西布政使○諭軍機大臣等王文韶奏統領湘軍藩司陳湜在防病故並請將該軍酌量裁撤各摺片覽奏均悉湘軍人數較多久留無益著卽陸續妥爲遣撤毋再遲緩陳湜從前頗著戰功並著詳悉查明具奏將此諭令知之○諭前據御史胡景桂奏參直隸清河道潘駿德貪婪不職各款暨署任邱縣知縣毛隆光科歛罰民當經諭令王文韶確切查辦茲據查明覆奏潘駿德被參各款或事出有因或查無實據惟其族姪潘龍曾業已由縣丞分發到省仍令在署司帳委員姚恩綬私藉葦草漁利未能隨時考察門丁收受隨封未能嚴加防範實屬咎有應得直隸清河道潘駿德著交部議處候補知縣姚恩綬罔利病民不知自愛著卽行革職候補縣丞潘龍曾著一併交部議處候補知縣裴季烜候補知縣商寶候補同知唐應駒查無實在劣跡著任邱縣知縣毛隆光查無科歛罰民各

情事均著免其置罰○長順奏吉林現錢奇絀亟宜設法補救擬遵照部咨開鑄銀錢所有仿照式樣前已咨請部示俟撥到時再行奏明辦理下戶部知之○丁丑調松壽爲江西按察使以毓賢爲山東按察使○總理各國事務衙門奏○衙門查年來教案迭出每議賠償累萬盈千上虧國帑良由地方官不習辦理以致公家受累無窮光緒十七年蕪湖教案南洋大臣劉坤一奏明應賠款項由該關道及知縣按月分賠在案○等竊維劉坤一所定分賠辦法固係慎重 帑藏亦欲懲前毖後俾知儆惕惟辦理不習該管官均難辭咎值竇道縣分賠不足以昭公允而重考成應請嗣後如遇教案賠償之款議結後由該管督撫藩臬道及府屬州縣分年按成償還歸公並分咨戶部及○衙門備案庶幾衆擎易舉亦可互相告誡略如簽差不慎本管上司分賠之意如蒙 俞允○衙門卽欽遵分行各直省一律辦理得 旨如所議行○總理各國事務衙門奏光緒二十二年二月十一日准軍機處鈔交御史陳其璋奏請嚴定教案處分一片奉 旨該衙門議奏欽此陳其璋片稱地方官辦理教案向無議處專條故每遇議處時各國公使動輒懷疑致多口舌近來教案甚多地方官不習處置自應嚴予處分然不先定章程恐議重議輕既難見信於洋人亦難保部中之無弊請 飭下總理衙門會同吏兵兩部先行議定章程等語○等查傳教既載在條約則地方官均有保護之責每遇教案各國使臣援約相持跡近要挾幾於無可收拾

總由該管官事前既不能照約保護臨事又不能拿犯辦兇每釀巨案若非釐定章程不足以示懲儆該御史所奏誠爲切要嗣後如有拆堂殺教之案各督撫將軍大臣等於審結後酌量案情輕重分別附參其文職處分各官查應併處分自以案情之輕重爲準近數年各省教案迭出地方官處分誠不能不定專條第操之過感必至以規避處分之故縱教虐民反致積隙日深發機愈烈迨至衅端既搆又自知一經呈報無望原情惟有束手聽參並不思力圖補救似與立法預防之本意轉有所妨等公同酌議嗣後如更有教堂被毀之案除實係有心故縱釀成巨案貽誤大局者由臣部酌量案情隨時奏明請旨辦理外其事關倉猝竭力保護而勢有所弗及者擬請將該地方官照防範不嚴降一級留任公罪例議處其保護未能得力自屬辦理不善應查照歷辦成案以不應重公罪降二級留任例定議其武職處分兵部查近年各省教案迭出地方武職人員誠不能不明定處分章程今該御史所奏係爲先事預防起見臣等公同商酌擬請嗣後遇有拆堂殺教之案除有心故縱以致釀成巨案者應由臣部酌量案情隨時奏明請旨辦理外如係事起倉猝追不及防應將地方官照防範不嚴降一級留任公罪例議以降一級留任其保護未能得力自係辦理不善應照不應重公罪降二級留任例議以降二級留任俾示懲儆均候 命下之日由臣衙門通行各省各出使大臣遵照辦理得 旨如所議行○壬午諭桂斌

等奏據堪布巴勒黨吹木巴勒呈稱近年貢使到京歷被白塔寺等處居住之喇嘛商人等串同誑騙銀兩請飭傳訊等語所有劉達喇嘛依什扎勒參王喇嘛丹登吹木巴勒楚達喇嘛楚勒圖木商人李三通事梅姓著步軍統領衙門按名嚴傳送交理藩院研訊確情據實究辦○松蒼奏光緒十五年准會典館頒發格式咨令測繪雪南全省輿圖十七年續頒表格及表格正誤均經前督撫臣行局委員辦理並通行各屬遵辦十八年各屬圖說漸齊復委通曉中西算法留心輿地之員入局辦理並因西南邊界今昔不同專派測繪學生前往勘辦又另派通曉夷文言語之人同往緝譯暨委督後局提調總理其事督率各員擬定編輯凡例及測量布算諸例仍遵定章以李兆洛胡林翼所刊一統輿圖爲藍本參以雪南輯志招募在籍候選人員及聰穎生監勘辦布算繪圖諸事俾三角八線之法不致訛錯滇省前因開化臨安等府沿邊勘界購有西洋測量儀器今復另置中西象限紀限各儀先就省城測量太陽高弧之緯度推究月食時刻之經度追中西儀器所測昭合然後推及各行屬州縣就地勢之高下方位之正斜輾輻之廣狹疆界之交錯村落之大小一一測量較準再將職官之廢置山鎮之脈絡水道之回環太陽出入之時刻分秒晝夜之贏縮短長以及島里人里之錯出百名今名之混淆一一鈎稽司事考核兩方比例繪成圖說歷一年餘而總散草圖始成復分發各屬地方官督同紳耆將更詳加覆勘譌書正之漏者補

之疑似者反覆以考驗之歧異者詳細以印證之折其衷而歸於是而不泥於詞惟證以今往來駁詰又歷兩年餘而斷始定雲南通省凡十四府五直隸廳三直隸州七十四廳州縣遵照定章省圖以百里爲方府圖及直隸廳州圖以五十里爲方廳州縣與管理錢糧自有轄境之佐式圖均以十里爲方共繪省圖一府圖一十有四直隸廳州圖八廳州縣圖七十有四州判圖一省府廳州圖之後綴以疆域沿革山川鎮水道攷說各一篇廳州縣圖後亦以七格表式將沿革疆域天度山鎮水道鄉鎮職官立表彙輯校勘概屬從詳訛誤悉已刊正其陳陳相因無稽之說概從節刪各土司則附見於該管府廳州縣不另設圖裝訂四函首以例言計二十六冊已於光緒二十一年五月告成嗣因普洱府之思茅廳寧江縣所轄猛烏烏得兩土司地奉 旨讓歸法管議俟交割立界完竣如何定議另繪準圖再行送館現奉會典館迭次嚴催未便久待茲將普洱府思茅廳寧江縣等圖加簽聲明併同各圖先行咨送查核俟猛烏烏得立界事竣再行另繪咨送彙辦惟滇省地處西南極邊郡縣多設自雍正以後又經兵燹之餘既無文獻足徵無無案牘可考界連緬甸遐邇南掌越南等處山高嶺峻水土惡劣瘴癘尤毒言語文字不通中國測量考訂計里開方本非易事在雲南尤難其人辦理之難迥異腹地並因兩烏立界未竣以致咨送稍遲等情據督後局司道會同署布政使湯壽銘詳請奏咨前來奴才覆加確核委係實在情形辦理亦尙精密

除與國專差咨送會典館查核外謹恭摺由驛具陳下所司知之○癸未以湖北煉鐵廠告成獎敘出力文職各員有差○甲申諭御史孫賦謙奏考試廩生請嚴密關防一摺著吏部議奏○諭陳寶箴奏知府因案被控請革職審辦等語湖南常德府知府文束任信劣紳招搖訛詐聲名甚劣並有藉端苛罰因案索賄情事文束著先行革職交陳寶箴督同藩臬兩司提集人證審明擬辦○鹿傳霖奏准西甯辦事大臣奎順陝西撫臣魏光燾電稱甘肅敗竄青海柴達木地方北可窺新疆南可入川藏北已有防恐或南竄請飭沿邊戒備并咨藏一體嚴防等語查青海南界川藏當經臣飛咨駐藏大臣奎煥請欽妥為防範一面添調營勇前赴打箭爐駐紮確探嚴防以免竄越伏思回匪多恃馬隊川藏界內山徑陡險非十分窮蹙不肯遽入絕地惟近年瞻對番官日肆橫暴侵陵各土司地界而土司遇有爭鬭尋衅之事往往附勢滋鬧西藏又值危急之秋若再勾結回匪竄擾為害尤大所幸該番官苛虐異常土民怨憤已深時有內變此時駐重兵於打箭爐既可防回兼以懾服各土司并可查看瞻對情形觀衅而動結納瞻民使為我用不惟目前瞻案易結且不難徐圖收回瞻對土地仍歸內屬然後川藏之界始能盡清一旦西藏有事四川尚有門戶可守此誠今日之急務也查瞻對原分設上中下三土司自土酋工布耶結父子叛亂多年廢則未平同治四年奉旨川藏會剿川省派委道員史致康督兵至打箭爐屬遷延不進藏兵

先捷攻克瞻對據有其地藉口耗費兵餉三十萬索償如數始允交回土地維時川中藍逆等匪勢正披猖帑項亦極支絀史致庸遞請以其地賞歸西藏前督臣略秉璋據稟奏請 朝廷因念藏番有破賊之功且其時視川藏原屬一體遂降 旨將上中下瞻對賞給達賴喇嘛派番官管理此瞻對撥歸藏轄之原委也自番官管理以來虐政橫徵瞻民不堪荼毒數年必一內鬩上年瞻番與明正土司互鬪時值辦大臣訥欽過境該番官旋即退兵初謂其尙知畏懼迨後確探始知實因瞻民又復內叛故撤兵回藏巢穴及駐藏大臣奎煥奏參革換而該番官竟敢抗玩不遵其恃強藐法已可概見且查瞻對距藏甚遠插入內屬土司之中本係川境內地一旦遽歸藏中值此時艱設西藏有事瞻對之地不問而即屬他人川省且無門戶可守危亡可立而待此 臣查悉情形日夜兢兢不能不及早圖維預籌布置以弭後患者也刻下乘嚴防回窺之便添募得力營勇馳赴打箭爐駐紮揀派明慎通達之大員前往不動聲色相機妥辦不至激生事端如瞻對再有內叛之事即可乘機進撫土民收回該地以理折服番藏再略加以賞需彼亦無詞則瞻地仍爲我有庶得布置邊防以固疆圉仰仗 皇上威福事機湊手則不獨川省之幸實大局之幸也 上諭軍機大臣等鹿傳霖奏添派營勇嚴防窺回並預籌辦理瞻對情形一摺覽奏均悉瞻對本係川屬近來該番官與明正土司互鬪恃強藐法自應及早圖維預籌布置著即乘嚴防窺回



之便揀派明幹大員添募得力營勇馳赴打箭爐駐紮不動聲色相機妥辦如瞻對有機可乘卽行進撫  
土民收回該地以固川省門戶總期辦理得人務令藏番心折毋至滋生事端是爲至要將此諭令知之  
○恩澤等奏照龍江省制錢缺乏請將部撥內中年官兵俸餉訓解鄂省鼓鑄銀元藉資補救下戶部議  
奏○丙戌 上幸 醇賢親王邸第詣 神殿前行禮並省視 皇本生母疾○諭軍機大臣等兵部奏  
歷年發遣太監於何時到配該管官並不取其收管按名報部以致在配脫逃無從稽察等語著吉林黑  
龍江各將軍查明歷年所發太監除已故外現存者若干名脫逃者若干名分別造冊限一月內報部嗣  
後每屆年終報部一次如有延誤卽由該部指名嚴參將此諭令知之○諭軍機大臣等有人奏副都統  
搜殺營勇激怒軍心請飭查辦一摺著延茂確切查明據實參辦原摺著鈔給閱看將此諭令知之○丁  
亥諭巡視中城給事中桂年等奏近來京師匪衆持械闖毆搶人奪財及行兇拒捕之案層見迭出請飭  
加重定罪等語著刑部議奏○諭巡視中城給事中桂年等奏太監在外結夥逞兇拒傷弁勇殞命請交  
部審辦一摺本月十八日正陽門外大柵欄地方有太監多人執持刀械在慶和戲園尋釁經該城副指  
揮楊紹時傳知練勇局派勇緝拿該太監等膽敢拒傷勇丁並將隊長趙雲起砍傷斃命實屬不法已極  
必應從嚴懲辦所有拿獲之太監李長才張壽山閻寶維苑連元陳和玉民人畢文祿等六名著交刑部

嚴行審訊按律定擬並究明在逃餘黨一併飭拿務獲究辦至被傷殞命之隊長趙雲起著兵部查案辦理另片奏太監滋事請加等治罪等語著刑部遵照康熙年間諭旨從嚴定議具奏○戊子授寬岡爲大學士○以兵部尙書榮祿爲協辦大學士○以麟書署步軍統領○調免雲南昆明邱北等縣光緒二十一年分被災田糧○己丑子故前任江南提督李朝斌於湖南省城建祠○總理各國事務衙門章京郎中舒文興法國費務林公司監工葛理義訂立龍州至鎮南關鐵路公司合同八款○庚寅命麟書管理戶部事務崑岡管理工部事務○調懷塔布爲禮部尙書以剛毅爲工部尙書調溥良爲戶部右侍郎以綿宜爲理藩院左侍郎○辛卯諭理藩院奏回子親王捐輸如何獎勵之處請旨一摺該親王捐輸實屬因公起見回子親王沙木胡索時著賞穿黃馬褂以示嘉獎○壬辰上奉慈禧端佑康頤昭豫莊誠壽恭欽獻崇熙皇太后幸醇賢親王邸第視臬本生母疾○癸巳諭軍機大臣等趙舒翹奏蘇城機匠因局員查捐聚眾滋事等語機捐關係餉項既經查有隱漏自應責令補認該機匠等竟敢聚眾毆官毀局竄局目無法紀著劉坤一趙舒翹嚴飭營弁將首要各犯查拿懲辦毋稍寬縱將此諭令知之○甲午內閣學士陳彝因病奏請開缺允之○子故安徽無爲州知州穆其澤事蹟交國史館立傳○諭福潤奏特參貪猾知府請旨革職一摺安徽省各州縣承辦考試供應繁多現經福潤議給公費將浮費概

行裁革廬州府知府范葆源輒敢藉故阻撓仍向所屬索取公費迫聞撤任之信該府意圖規避卽以親老多病開缺終養爲請實屬貪婪狡猾有玷官箴范葆源著卽行革職以示懲儆

光緒一百三十四

臣朱壽朋敬編

臣潘鴻鼎恭校

五月內申諭軍機大臣等有人奏山東掖縣等州縣糧銀折收過多請飭迅行核減一摺據稱萊州各屬掖縣平度每銀一兩折收京制錢五千六百文膠州高密卽墨每銀一兩折收京制錢五千八百文均係同治年間所加其時銀價每兩易錢三千八九百文現時庫平足色銀每兩只易京制錢二千六百餘文各屬浮收多至一倍有餘請飭核減等語著李秉衡確查各州縣徵收數目如有浮收情弊一律從實核減以恤民生將此諭令知之○諭軍機大臣等有人奏總兵謀利營私請飭查辦等語據稱河南歸德鎮總兵崔廷桂歷任最久營伍廢弛弊竇爲利縱令其子河南候補道崔鴻鼎嫖游浪費侵蝕餉項並有縱勇滋事得賄釋匪情事著任道鎔按照所參各節確切查明據實具奏毋稍徇隱原片著鈔給閱看將此諭令知之○李端棻奏開國於天地必有興立言人材之多寡繫國勢之強弱也去歲軍事既定皇上順窮變通久之義將新庶政以圖自強恐辦理無人百廢莫舉特降明詔求通達內外能用之士所在咸令表薦以備擢用綸綍一下海內想望以爲豪傑雲集富強立致然數月以來應者寥寥

卽有一二或僅束身自好之輩罕有濟難現偉之才於側席盛懷未能盡副夫以中國民衆數萬萬其爲士者十數萬而人才乏絕至於如是非天之不生才也教之道未盡也夫二十年來都中設同文館各省立實學館廣方言館水師武備學堂自強學堂皆合中外學術相與講習所在皆有而所謂教之道未盡何也諸學皆徒習西學西語西文而於治國之道富強之原一切要書多未肄及其未盡一也格致製造諸學非終身執業聚眾講求不能致精除湖北學堂外其餘諸館學業不分齋院生徒不重專門其未盡二也諸學或非試驗測驗不能精或非游歷察勘不能確今之諸館未備器圖未遣游歷則日求之於故紙堆中終成空談自無實用其未盡三也利祿之路不出斯途俊慧子弟率從事帖括以取富貴及既得科第遂與學絕終爲棄才今諸館所教率自成童以下苟逾弱冠卽已通籍雖或向學欲從末由其未盡四也巨厦非一木所能支橫流非獨柱所能砥天下之大事變之亟必求多士始濟艱難今十八行省祇有數館每館生徒祇有數十士之欲學者或以地僻而不能達或以額外而不能容卽使在館學徒一人有一人之用尙於治天下之才萬不足一況於功課不精成就無幾其未盡五也此諸館所以設立二十餘年而國家不一收奇才異能之用者惟此之故曰然則嚴穴之間好學之士豈無自績學以待驅策者曰格致製造農商兵礦諸學非若考據詞章帖括之可以閉戶殫察而得也嘗必待編擇而後

得讀一人之學能編繹乎業必待測驗而後致精一人之力能購置器乎學必待游歷而後徵實一人之身能履躋地乎此所以雖有一二僑儻有志之士或學焉而不能成或成矣而不能大也乃者欽奉明詔設官書局於都畿領以大臣以重其事伏讀之下仰見聖神措慮洞見本原臣於局中一切章程雖未具悉然知必有良法美意以宣達聖意闡揚風化者他日奇才異能由斯而出不可勝數也惟育才之法匪限於一途作人之風當徧於率土臣請推廣此意自京師以及各省府州縣學皆設學堂府州縣學選民間俊秀子弟年十二至二十者入學其諸生以上欲學者聽之學中課程誦四書通鑑小學等書而輔之以各國語言文字及算學天文地理之粗淺者萬國古史近事之簡明者格致理之平易者以三年爲期省學選諸生年二十五以下者入學其舉人以上欲學者聽之學中課程誦經史子及國朝掌故諸書而輔之以天文輿地算學格致製造農桑兵礦時事交涉等書以三年爲期京師大學選舉貢監生年三十以下者入學其京官廩學者聽之學中課程一如省學惟益加專精各執一門不遷其業以三年爲期其省學大學所課門目繁多可倣宋胡瑗經義治事之例分齋講習等其榮途一歸科第予以出身一如常官如此則人爭濯磨士知嚮往風氣自開技能自成才不可勝用矣或疑似此興作所費必多今國家正值患貧何處籌此巨款臣查各省及府州縣率有書院歲調生徒入院肄業聘師講授

意美法良惟奉行既久積習日深多課帖括難育異才今可令每省每縣各改其一院增廣功課變通章  
程以爲學堂書院舊有公款其有不足始撥官款補之因得增廣則事順而易行就近分籌則需少而易  
集惟京師爲首善之區不宜因陋就簡示天下以模範當酌動帑以崇體制每歲得十餘萬規模已  
可大成中國之大豈以此十餘萬爲貧富哉或又疑所立學堂既多所需教習亦衆竊恐乏人堪任此職  
臣以爲事屬創始學者當起於淺近教者亦無取精深今宜令中外大吏各舉才任教習之士悉以名聞  
或就地聘延或考試選補海內之大必有可以充其任者學堂既立遠之得三代庠序之意近之采西人  
廩院之長興賢教能之道思過半矣然勸其記誦而不廓其見聞非所以造異才也就學者有日進之功  
其不能就學者無講習之助非所以廣風氣也今推而廣之厥有與學校之益相須而成者蓋數端爲一  
曰設藏書樓好學之士半屬寒賤購書既苦無力借書又難其人坐此孤陋寡聞無所成就者不知凡幾  
高宗純皇帝知其然也特於江南設文宗文匯文瀾三閣備皮秘書悉人借觀嘉慶間大學士阮元推  
廣此意在焦山靈隱起立書藏津逮後學自此以往江浙文風甲於天下作人之盛成效可睹也泰西諸  
國頗得此道都會之地皆有藏書其尤富者至千萬卷許人入觀成學之衆自由於此今請依乾隆故事  
更加增廣自京師及十八行省會咸設大書樓調殿板及各官書局所刻書籍暨同文館製造局

所譯西法按部分送各省以覽之其或有切用之書爲民間刻本官局所無者開列清單訪明價值徐行購補其西學陸續譯出者譯局隨時咨送定章程許人入樓看讀由地方公擇好學解事之人經理其事如此則向之無書可讀者皆得以自勉於學無爲棄才矣古今中外有用之書官書局有刻本者居十之七八每局酌提數部分送各省其費至省其事至順一奉 明詔事卽立辦而餉道學者增益人才其益蓋非淺鮮也二曰創儀器院也格致實學咸藉試驗無遠視之鏡不足言大學無測繪之儀不足言地學不多見礦質不足言礦學不習觀汽機不足言工程之學其餘諸學率皆類是然此等新器所費不資家卽累封亦難備購學何從進業焉能成今請於所立諸學堂咸別設一院購藏儀器令諸學徒皆就試習則實事求是自易專精各器擇要而購每省撥萬金以上已可粗備此後陸續添置漸成大觀則其費尙易措辦而學徒所成視昔日紙上空談相去遠矣三曰開譯書局也兵法曰知己知彼百戰百勝今與西人交涉而不能盡知其情僞此見弱之道也欲求知彼首在譯書近年以來製造局同文館等處譯出刻成已百餘種可謂知所務矣然所譯之書詳於術藝而略於政事於彼中治國之本末時局之變遷言之未盡至於學校農政商務鐵路郵政諸事今日所亟宜講求者一切章程條理彼國咸有專書詳哉言之今此等書悉無譯本又泰西格致新學製造新法月異歲殊後來居上今所已譯出者率十年以前之



書且數亦甚少未能盡其所長今請於 京師設大譯書館廣集西書之言政治者論時局者言學校農  
商工礦者及新法新學近年所增者分類譯出不厭詳博隨時刻布廉值發售則可以增益見聞開廣才  
智矣四曰廣立報館也知今而不知古則爲俗士知古而不知今則爲腐儒欲博古者莫若讀書欲通今  
者莫若閱報二者相須而成缺一不可泰西每國報館多至數百所每館每日出報多至數萬張凡時局  
政要商務兵機新藝奇技五洲所有事故靡所不言閱報之人上自君后下自婦孺皆足不出戶而於天  
下事瞭然也故在上者能措辦庶務而無壅蔽在下者能通達政體以待上之用富強之原厥由於是今  
中國邸鈔之外其報館祇有上海漢口廣州香港十餘所主筆之人不學無術所言率皆淺陋不足省覽  
總署海關近譯西報然所譯甚少又未經印行外間求由得見今請於 京師及各省會並通商口岸繁  
盛鎮埠咸立大報館擇購西報之尤善者分而譯之譯成除恭繕進呈 御覽並咨送京外大小衙門外  
卽廣印廉售布之海內其各省政俗土宜亦由各館派人查驗隨時報聞則識時之俊日多幹國之才日  
出矣五曰選派游歷也學徒既受學數年考試及格者當選高才以充游歷游歷之道有二一游歷各國  
肄業於彼之學校縱覽乎彼之工廠精益求精以期大成一游歷各省察驗礦質鈎核商務測繪輿地查  
閱物宜皆限以年期厚給薪俸隨時著書歸是有司察其切實有用者爲之刊布優加獎勵其游歷而無

狀者官則立予黜退士則奪其出身數年之後則輟軒絕域之士斐然成章郡國利病之書備哉榮爛矣  
或疑近年兩次所派游歷學生未收大效不知前者所派游歷乃職官而非學童在中國既未經講求至  
外洋亦未嘗受學故事涉空衍寡有所成其所派學生又血氣未定讀中國書太少游歷絕域易染洋風  
雖稍有技能亦不適於用今若由學堂選充兩弊其免其所成就必非前此之所能例也夫既有官書局  
大學堂以爲之經復有此五者以爲之緯則中人以上皆可自勵於學而奇才異能之士其所成就益遠  
且大十年以後賢俊盈廷不可勝用矣以修內政何政不舉以雪疆恥何恥不除上以恢 列聖之遠猷  
下以懋強鄰之狡敗道未有急於是者若仰蒙 采擇乞 飭下中外大臣妥議章程遵 旨施行得

旨該衙門議奏○德馨奏光緒十五年十月三十日准會典館咨纂修會典需用輿圖擬就圖式並辦理  
章程飭照所頒格式測繪送館等因當經前撫 臣德馨行司轉飭各府州轉行各屬州縣延請精於測繪  
之人遵式辦理旋於十七年續准會典館頒發章程表格並准兵部咨飭繪驛站鋪遞相距里數圖及說  
送部核辦又經轉行去後嗣據各屬繪圖呈送查其辦法均未合式蓋表格中七事曰沿革疆域天度山  
鎮水道鄉鎮職官內惟沿革及職官不關測量其餘五項均須用儀器逐加細測始能得其度分秒數方  
向道里至於山之高斜度水之闊狹深淺尤非測量不可即經前撫 臣德馨飭司在省城藩司署內設局

擬定辦法章程遴委補用通判陳希曾爲提調卽用知縣孫洞爲總纂大挑知縣楊承曾等爲纂輯分校等官並委補用府經歷顧永城等專辦驛站鋪遞相距里數圖及詳細貼說一面派員偕同測算紳士並購置外洋度時表經緯儀奪林儀及製造象限儀等項次第舉辦至十八年夏間稍有頭緒曾先測省城經緯度又以邵陽湖素稱巨潏爲一省要區春夏則汪洋無際秋冬則汶港紛歧派員週歷測定邵湖全境復委偕同精於測量紳士馮繼祖等先測七十九鄉州縣經緯並按府分測地址隨測隨繪以一二方圖爲之根本一切夫馬等費俱由省局發給惟江西幅員廣闊襟江帶湖水道紛歧廣繞嶺南諸郡萬山叢繞且界連閩浙粵東崇山峻嶺綿互不斷每測一縣非累月兼旬不能竣事其有一隅未合卽令覆測更正不敢稍涉畏難苟安致有簡率輾轉需時是以兩次奏准展限辦理臣抵任後飭司督率局員認真趕辦至光緒二十一年冬間草圖始成復飭提調總纂及幫辦各員分任稽考予以課程朝夕從事彙輯諸圖附摺彙籍凡道里之遠險疆域之犬牙相錯者必期脗合無間山嶺之嶮峻起伏必期脈絡貫通水道之紛歧雜出必期支幹分明至於關津要隘驛站程途市鎮墟集水陸營汛皆加詳細參究悉心校勘由大縮小恪遵頒式計里開方茲據署布政使翁曾桂詳稱嚴加課責於本年六月造成計省總圖一府總圖一縣圖七十有五邵陽湖全圖一吳城樟樹河口景德各鎮圖四又省圖說一府直隸州圖說十有

四各散關州縣表格七十有九共十五冊裝作四函外附驛站鋪遞相距里數圖及說共十四冊裝作四函至辦理興圖一切經費溯自開局以至告成其購辦儀器及員紳薪水夫馬等項歷時既久積少成多共用銀三萬六千七百二十五兩八錢九分由司庫設法挪墊均係撙節支用並無絲毫浮冒伏查湖北湖南等省辦理興圖經費均已奏准動用撥金江西事同一律應請援照於二成加撥項下作正開支以清墊款再查鄂省興圖告成援照陝西成案俟會典館核復後將在事員紳從優保獎此次江西在事各員盡心竭力勞瘁不辭編繪成冊克竟全功不無微勞足錄應請援照辦理以示鼓勵下所司知之○戊戌兩○上奉 慈禧端佑康頤昭豫莊誠壽恭欽獻崇熙皇太后幸 醇賢親王邸第視 皇本生母疾○己亥授麟書爲武英殿大學士崑岡爲體仁閣大學士○辛丑 上奉 慈禧端佑康頤昭豫莊誠壽恭欽獻崇熙皇太后幸 醇賢親王邸第視 皇本生母疾○壬寅 皇本生母醇賢親王嫡福晉葉赫那拉氏薨 上詣邸第行禮成服○諭御史熙麟奏請將難雇一班與恩蔭外用人員一律准予分發一摺著該部議奏○諭御史熙麟奏請將捐納州縣並正途出身人員定限銓選等語著該部議奏○諭左庶子濟澐奏外省鄉試房考攜帶私人入場閱卷請行嚴禁一摺科場條例本極森嚴嗣後各省鄉試該督撫等務當選擇品學兼優之員充當同考官入場後如查出賄帶私人情弊卽著據實參奏以示懲儆

○癸卯諭朕欽奉 慈禧端佑康頤昭豫莊誠壽恭欽獻崇熙皇太后懿旨前者醇賢親王之喪當開考  
緣章恪遵 祖訓定稱號曰皇帝本生考今醇賢親王之嫡福晉葉赫那拉氏薨逝宜稱曰皇帝本生妣  
一切典禮著該衙門詳議具奏○諭朕欽奉 慈禧端佑康頤昭豫莊誠壽恭欽獻崇熙皇太后懿旨皇  
帝本生母醇賢親王嫡福晉葉赫那拉氏宅心和厚秉性堅貞百度醇宜大親咸仰洵佐賢王之內治聿  
爲形管之儀型深宮誼篤慈親特隆禮貌福晉每懷謙抱謹慎有加頃因時疾日增寢食頓減屢次率同  
皇帝臨邸看視慰問再三方期樂仰奏功遐齡克享乃竟於本月初八日辰刻奄然長逝撫今追昔摧痛  
良深著卹陀羅經被卽日親往賜奠皇帝詣邸成服行禮派大學士管理工部事務崑岡禮部尙書管理  
內務府大臣懷塔布刑部右侍郎總管內務府大臣文琳工部右侍郎英年辦理喪事一切事宜官爲辦  
理以示篤念宗親至意○甲辰上辛 醇賢親王邸第詣 皇本生妣金棺前行奠祭禮○諭朕欽奉  
慈禧端佑康頤昭豫莊誠壽恭欽獻崇熙皇太后懿旨本日禮部奏遵醇賢親王嫡福晉薨逝一切典  
禮分別條款請旨遵行一摺皇帝服制卽著定爲持服期年御編素十一日報朝十一日期年內請安及  
聽政召見外御便殿時仍用素服 壇 廟大祀皇帝親詣行禮中祀均遣官恭代元旦詣 堂子行禮  
仍御禮服謁慈寧宮仍御禮服作樂其太和殿朝賀御禮服升殿不宜表樂設而不作蒙古朝正來京王

公例賜筵宴照舊舉行廷臣筵宴均著停止其祭文書皇帝名餘著照所議辦理○杭州將軍吉和因病奏請開缺回旗調理允之○乙巳夏至大祀 地於 方澤遣世鐸恭代行禮○上幸 醇賢親王邸第詣 皇本生妣金棺前致祭○諭朕欽奉 慈禧端佑康頤昭豫莊誠壽恭欽獻崇熙皇太后懿旨崑岡等奏醇賢親王嫡福晉初祭大祭奏移各日期一摺所有五月二十日行初祭禮二十九日行大祭禮大月初八日奉移園寓皇帝均親詣行禮御青長袍褂冠摘纓奏移前期一日皇帝親詣行禮照大祭禮禮文致祭奏移日皇帝詣邸第恭送後至倚虹堂候過還西苑門初十日仍詣園寓奠酒行禮○諭王文韶奏特參營員廢弛捕務擾累地方請旨懲儆一摺儘先都司梁明有在駐防處所遇有匪徒搶掠延不追捕且有誣拿平民刑訊訛索情事候補守備陳桂清平日不能約束兵丁遇事輒捕多人刑訊詐贓梁明有陳桂清均著卽行革職不准留營効力以肅營伍○丙午 上幸 醇賢親王邸第詣 皇本生妣金棺前致祭○諭朕欽奉 慈禧端佑康頤昭豫莊誠壽恭欽獻崇熙皇太后懿旨本年六月皇帝蒞壽照常行禮樂設而不作停止聽戲○以澂祿爲杭州將軍○丁未 上幸 醇賢親王邸第詣 皇本生妣金棺前致祭○兵部左侍郎巴克坦布以病免○戊申 上幸 醇賢親王邸第詣 皇本生妣金棺前致祭○諭前據御史熙麟奏北洋總辦機器局道員何雪龍任意妄爲列款糾參當經諭令榮祿確查茲

據查明覆奏傳雲龍被參各款或查無不合或事屬細微惟任令伊子傅范根傅范敏在該局肄習親串邱錫釗派充司帳究屬不知避嫌並輕聽委員張爵之言罰扣匠役工食亦屬操切委員張爵於應罰工食輒議三扣以致衆心不服實屬辦理不善總辦機器局候補道傅雲龍試用直隸州州判張爵著交部分別議處○己酉 上幸 醇賢親王邸第詣 皇本生妣金棺前致祭○訓榮惠爲兵部左侍郎以文林爲兵部右侍郎○以世續爲總管內務府大臣○庚戌 上幸 醇賢親王邸第詣 皇本生妣金棺前致祭○子故庫倫辦事大臣喜昌於原籍建祠事蹟交國史館立傳○諭鑾儀衛奏恭備要差需款孔急請飭備補地租銀兩一摺直隸欠解鑾儀衛地租銀兩前經該衙門奏准飭催至今數月之久據稱解到銀四千兩其餘仍未報解實屬拖延現在該衙門差務緊要需款甚急著直隸總督轉飭藩司無論何款趕緊籌撥銀二萬兩務於本月內如數解到以應急需本年地租銀兩並著儘徵儘解年清年款毋得稍有帶欠○諭保年等奏旗營兵丁聚衆要挾滋鬧請將該管各官分別議處並自請查議一摺本年四月間廣州正藍旗閒散鍾汝拔因在街搶奪衣服經巡防營統帶知縣李家焯拿獲交協領等領回究辦旋經譚鍾麟咨行將該犯鍾汝拔先行銷去旗檔突有漢軍老幼多人在將軍衙門代該犯求免銷去旗檔鍾汝拔旋即因病身故復有漢軍旗人聚衆至李家焯寓所打毆並將李家焯之子李世勝等毆傷竄

屬役法已極卽著保年等嚴飭查拿滋事首從各犯務獲究辦該管協領劉紹基佐領潘廣澤於兵丁滋鬧之時未能立時解散防禦談鴻春騎校談鴻勳失於覺察亦難辭咎著交部分別議處保年興存依克坦均著交部查議○辛亥 上幸 醇賢親王邸第詣 皇木生妣金棺前致祭○諭刑部奏遵議御史彭述奏武營扣餉缺額請嚴定罪名一摺軍營扣餉缺額本有治罪專條全在各督撫及統兵大員認真稽查有犯必懲方足以儆貪婪而挽積習嗣後各省遇有武營扣餉等弊一經審實卽行按照刑部律例計贓科罪不得曲爲徇隱並不准僅以革職留營及永不敘用等詞含糊完結以肅軍政○諭刑部奏審明御史敬祐奏參山東逃犯邢二等霸占地畝一案據稱提集邢二等疊次研訊所供情節證以各衙門查覆與該御史所奏無一相符並據山東巡撫劉崑益都長山兩縣並無邢二等毆斃周親尊長之案查風憲官彈事不實律應以誣告論應如何懲辦之處請旨等語敬祐陳奏此案妄聽人言誣陷良民實出情理之外敬祐著卽行革職科道例應風聞言事若竟懷挾私見任意誣陷甚至爲人驅使藉言事爲納賄之資則是自蹈愆尤朝廷亦惟有執法從事經此次申儆之後該科道等備再有前項情弊必當從重懲處決不寬貸○壬子 上幸 醇賢親王邸第詣 皇木生妣金棺前致祭○諭軍機大臣等御史陳其璋奏錢價騰昂有礙河工發項亟宜變通辦理一摺據稱東河歲修之款前經許振祿奏定每年工



費不得過六十萬兩之數近來錢價日昂耗折甚鉅各料必不能多請飭河道總督會同河南巡撫察看情形或設法籌辦銀圓或仿照天津鼓鑄制錢以資周轉並令河督嚴飭屬員多儲料物以濟要工等語河工購辦料物全在制錢充足方足以資周轉現在錢價既昂購辦必多窒礙自應設法變通著任道鎔劉樹堂按照該御史所奏或辦銀圓或鑄制錢體察情形妥速辦理河工關係緊要在道鎔當督率屬員將應用物料務於大汛以前一律購齊不准稍有缺乏致誤要工至所稱民間應解錢漕准其搭用銀圓一節著劉樹堂酌量辦理原摺著鈔給閱看將此各諭令知之○鹿傳霖電致總理各國事務衙門頃准駐藏幫辦大臣訥欽咨覆查無廓藏失和決戰之事僅有界務兩案已結一案刻正查斷或別有秘謀則不可知惟劃界行茶等事藏番違抗曉諭違賴管事攬權惑於釐小更不聽開導曉諭對番官仍抗不遵撤等語伏思廓藏決戰之言英人故為此說必有狡謀李毓森由印赴藏或可密探消息新藏使文海旬日可到當與熟籌酌辦惟據報曉諭番糾眾出巢盤踞章谷土司官寨勒令投曉委員業已馳往仍飭婉為開導一面勒兵以待恐難善了除詳細陳奏外請先代奏又電稱昨准藏咨廓藏無決戰事當即電請代奏在案新藏使文海現已抵川今據委員李毓森行抵上海電稟以廓藏既無決戰事自可毋庸解印藏界務大臣訥已咨印督緩待文大臣到任再為勘辦是毓森奉委兩事均無可辦惟業已奏咨應否仍出洋

赴藏即可毋庸前往以免耗費請示前來伏思解釋廓藏及隨勘界務兩事現准藏咨一則並無失和一則緩待新任誠如李毓森所稟赴藏無可籌辦惟既經奏咨如總署已照會駐京英使知照印督則應仍飭李毓森航海由印度入藏藉可密探消息如尚未照會英使則似可中止敬祈查明代奏奏入軍機大臣奉 旨鹿傳霖電悉李毓森著仍赴藏隨勘界務○癸丑兩○上幸 醇賢親王邸第詣 皇本生妣金棺前致祭○諭御史彭述奏請疏通各項班次變通過缺先抵補章程並請定濫保處分各摺片著該部議奏○甲寅 上幸 醇賢親王邸第詣 皇本生妣金棺前行初祭禮○乙卯諭翰林院代奏檢討朱育仁條陳理財富國詳籌利弊一摺著戶部議奏○諭依克唐阿奏已革道員請飭驅逐等語奉天候補道余溶業經該將軍奏參革職仍復逗遛奉省招搖滋事實屬怙惡不悛已革道員余溶著卽行驅逐回籍不准逗遛○諭御史楊崇伊奏總署京方孝傑私自出京意圖謀利請飭查辦等語方孝傑著開去總理各國事務衙門章京並著該衙門堂官查明參奏○諭依克唐阿奏道員把持稅務據實糾參一摺奉天東邊等處稅捐前經依克唐阿奏准派員會同徵收現派候補道王頤勳等前往稅局會徵乃東邊道張錫鑾並不會同商酌自行分派總辦幫辦委員經收所有稅款均送道署並未解省似此任意把持顯有希圖中飽情弊張錫鑾著先行開缺交依克唐阿嚴行查辦○諭前據已革御史敬祐奏庫倫辦

事大臣衙門承審已故扎薩克台吉車林多爾濟妻妾爭產一案濫動非刑適傷婦女等語當諭令桂斌確查據查明定擬具奏此案已革台吉車林多爾濟之妾楊吉拉木以爭產細故捏造重情誣控多人並有行賄情事楊吉拉木應得罪名並著照所議完結餘均依議辦理前庫倫辦事大臣安德禔聽捏造之詞收受銀兩追經該妾婦控告始將原職退出實屬貪鄙安德禔著交部議處刑部通紳克圖隨同賁稿亦屬不合著交該衙門察議花翎三品銜前五品官巴圖成格勒將誣告之案不問虛實一味追求雖未受賄實屬不安本分著革去翎銜交該旗嚴加管束○崧蕃奏光緒二十二年二月二十六日承准軍機大臣字寄本年正月三十日奉 上諭雲南向產五金貴州出鉛素旺山西所出之鐵夙稱精良現雖未據覆奏均宜及時攻採以期逐漸推廣卽將籌辦情形據實迅速覆奏總之開辦礦務以金銀礦務爲最先各該省如能實力訪查確有金銀礦地設法興辦自較煤礦等項得款爲鉅等因欽此仰見 聖主深宮焦勞推廣利源之至意下懷欽悚莫可名言查雲南五金各廠承平時計有六十餘處兵燹以後除銅務一項已廢 特派唐炯督辦外其餘金銀錫鐵各廠計尙有三十處之譜或洞老山空久經停歇或從前極旺之地現在積水過深無從著手或現雖開辦而所出無多僅敷成本或官雖封禁而附近無業貧民不時私自採取種種情形不一而足當此需款孔亟允宜收此天地自然之利以俾國用而裕度支如

才身受厚恩天良其在敢不竭力圖維冀紓宸厪當飭藩臬會同善後局司道妥議詳辦現擬遵委熟  
悉礦務之員分赴各屬先將辦有金銀各廠會同該地方官一律查勘明確分別何處可辦何處不能  
辦再設法籌備官本在於礦苗最旺之處認真開採以期得款較鉅一面廣集商股加委妥員逐漸擴充  
辦理併將錫鐵各廠亦次第興辦緣雲南地處邊瘴兵燹後實鮮富商大賈若不先發官本商民仍多觀  
望必致日久無濟徒誤事機且查雲南礦務從前承平之時均係用本地工匠開採煎煉歷著成效此次  
亦擬不設機器廠不用外洋礦師以節糜費而杜後患務使開一分利源中國即得一分利益惟是天財  
地寶半皆燬運而生消長盈虛非可先機而預決應懇 天恩俯准 敕部將一切例章略為變通並寬  
予限期俾臣得以督飭承辦各員招集紳商廣為開採斷不敢畏難苟安一奏鑒核自干咎戾下戶部知  
之○內辰諭總理各國事務衙門奏查明章京私自出京請交部嚴議一摺總理各國事務衙門章京刑  
部候補主事方孝傑託病請假潛赴天津顯有謀利情弊方孝傑業經撤去章京差使著交部嚴加議處  
○丁巳諭軍機大臣等劉坤一電悉山東曹單一帶本係盜賊淵藪此次刀匪出沒於山東江南兩省之  
間該處民人集團守禦肆擾情形已可概見著劉坤一李秉衡各派隊伍速往鎮壓如敢抗拒即就地剿  
除慎毋姑息養奸致貽巨患○戊午予故提督前署貴州古州鎮總兵管星阿巴圖魯陶茂林照軍營立

功後積勞病故例從優議卹並附祀會國聖專祠○予故提督銜留甘補用總兵烈勇巴圖魯朱超發照  
單營立功後病故例從優議卹事蹟交國史館立傳並附祀湘省昭忠祠○諭陳寶箴奏查辦劣幕任購  
參款業經據實具奏現接直隸布政使王廉印電內稱任購無其劣跡查辦不宜太甚等語王廉於並不  
干己之事輒用印電請託殊屬不合著交部議處○己未又兩○崇光奏請開去總管內務府大臣差使  
允之○辛酉吏部右侍郎王文錦卒賜卹如例○諭軍機大臣等劉坤一電悉刀匪拒捕開仗情形甚重  
現雖敗回單縣其匪首劉士端尙潛伏東境著劉坤一嚴飭防堵並電知李秉衡卽速掩捕如肅會剿卽  
著飭營前進務期速了毋致蔓延爲要○壬戌調吳廷芬爲吏部右侍郎兼署工部右侍郎以楊頤爲兵  
部右侍郎○胡聘之奏准總理各國事務衙門咨議復御史王鵬運請求商務一摺奏奉 諭旨飭令各  
督撫於省會設立商務局由各商公舉殷實穩練素有聲望之紳商派充局董將該省物產行情逐細請  
求以期擴充商利嗣又准咨議復前翰林院侍讀學士文廷式條陳養民事宜一摺行令仿照設立商局  
章程招集紳商爲勸辦各等因查原奏內稱開渠植樹蠶絲藝茶植棉等項或非各省所宜或須逐漸  
推廣能否開辦容 臣體察情形再行奏明辦理惟所稱葡萄釀酒皮毛筋角等貨皆係北土所產自宜及  
時擴充查晉省葡萄隨在皆有尤以文水一帶所產爲最誠宜設局開辦延請華洋人之精此業者教之

配道設法銷售且古昔酒醋在官米麵等類皆爲之準則此則民爲釀售官酌補助尤屬有利無弊至於羽毛齒革載在禹貢本與金錫同珍今之皮毛諸貨產自口外者通行海內皆省腹地亦間有之但工劣質粗行銷尙滯若能招商設局延訂專門講求機器製口內外毛貨加工精造自可廣銷路而擴利源惟是人情樂與觀成難與圖始齊省僻處偏隅商民率皆狃於故常若但由官設局勸辦衆情不免疑阻非得本省殷富紳商品望素著之人爲之倡導恐難集事查有籍隸山西之刑部候補郎中曹裕候選道冀以蘇候選知府劉篤康並皆識見明通品行端謹鄉望素孚擬調該員等來督由臣督同司道與之商辦一切必能聯絡官商合爲一氣俟在省城設立商務總局後卽就本省土貨足於行銷者先行集資試辦此外查有可興之利再行隨時推廣卽將來開辦礦務一切招商集股事宜亦可派令經理如蒙 俞允擬請 旨飭下部臣速令該員等來督襄助實於商務大有裨益得 旨如所請行○癸亥 上辛 醇賢親王邸第詣 皇本生妣金棺前行大祭禮○命崑岡管理理藩院事務毋庸管理工部○以徐樹銘兼署刑部右侍郎○諭右庶子安澂奏各省實缺州縣不宜更調請飭嚴定章程一摺著吏部議奏○諭右庶子安澂奏督撫參劾屬員請飭詳陳劣跡以杜弊端等語疆吏參劾屬員應以核實爲主嗣後務須詳核劣跡毋得以空言參奏○是月德意志國使臣神珂回國參贊貝威士署理

六月丙寅諭前據陳寶箴奏查辦劣幕任職一案近接直隸布政使王廉印電據實上陳當經降旨將王廉交部議處茲據王文韶奏藩司王廉以前次印電並非請託告懇代奏剖明心跡鈔錄原電呈覽一摺王廉以並不干己之事輒發印電即非請託已有應得之咎閱電內籍其家產千萬不可等語非請託而何乃不聽候部議曉諭嚴辦殊屬冒昧王廉著即行革職王文韶率行據情代奏亦屬不合著交部察議○丁卯兩○以松安爲內閣學士○調員鳳林爲直隸布政使以徐鼎三爲山西布政使調桂中行爲湖南按察使以蔡希州爲廣西按察使○諭依克唐阿奏請調補副都統等語盛京副都統前已有旨簡放副都統各省副都統向係特旨簡放該將軍率請以福州副都統綽哈布調補實屬冒昧依克唐阿著交部議處○諭李秉衡奏黃流伏汛盛漲下游利津縣屬北岸之趙家菜園漫溢成口請將在事各員分別參處並自請議處一摺本年山東黃河伏汛驟漲五月十八日下游利津縣北岸趙家菜園因值風狂浪急搶護不及致將堤身刷塌七八十丈由東北土塘順流而下與呂家窪倒漾之水相接在事員弁實屬疏於防範門將徐家慶著即行革職知縣張學易巡檢方棟林均著革職留工其下游提調候補知府倉爾穎著摘去頂戴總辦候補道丁遠意著交部議處李秉衡督率無方著一併交部議處該撫務當督飭在工各員加意防護即將漫堤盤築裹頭免致續塌○戊辰又兩○己巳總理各國事務衙門奏查通商各

口機器製造貨物南洋之紡織線絲北洋之釀酒糖經南北洋大臣奏請止完出口正稅或請寬免數年稅釐無非損上益下冀拓商務之意其時並無洋商製造明文原可從權辦理自馬關立約後各國洋商均可製造土貨爲歷來條約所不載自應統籌公平辦法以杜漏卮而免藉口現日本商人已在上海購地設廠各國洋商亦紛紛設廠轉瞬通商口內機廠林立百貨閭閻既享製造之利益應守完稅之責成此等創辦之事只可酌定稅章且無畸重畸輕之別庶易遵守溯查洋商販運洋貨進口大半每值百兩徵收正稅五兩運入內地再交子口稅二兩五錢洋商請領三聯單入內地採買土貨完納出口正稅外再納子口半稅即准裝運出口是洋商販運貨物無論出口進口雖均以一正稅一子稅爲斷而於土貨未入洋商手之先洋貨既入華商手之後均須完納釐金以補稅課之不足況製造貨物則船腳運費保險人工均省成本較輕獲利頗厚且等公同商酌除各省土貨應於出產處所完納落地稅釐由各該省督撫自行籌辦外其機器製造之貨不論華商洋商均於離廠之先仿照洋貨進口例徵收值百抽五之正稅再加徵一倍以抵內地釐金統計每值百兩徵銀十兩此後無論運往何處概免抽釐以稅課之所贏補釐金之所絀於國課尙無出入當此度支奇絀因應繁難非爲亡羊補牢之謀聊寓借資定主之意華商食毛踐土應知籌畫維艱洋商貨物暢行宜以從同爲願如蒙俞允等即咨行南北洋



大臣轉飭各海關監督一體遵照辦理所有機器製造貨物酌定稅章緣由理合恭摺具陳伏乞 皇上聖鑒訓示遵行謹奏再 臣衙門據總稅務司赫德呈稱通商以來凡貨物出入內地或完盤金或完子口稅洋商貨入內地完納子口稅領有稅單者即免完沿途盤金此華洋各商一律辦理之法土貨出內地領有三聯報單者沿途免完盤金祇須抵口完納子口稅出口回國此則洋商獨有之利益華商不能照辦於是常有華商假託洋商各號販運土貨希圖免盤該貨並不運送外國以致正經貿易與各省盤捐兩有妨礙欲杜此項弊端惟有准華商洋商一律請領三聯報單置買土貨運口流弊既可杜絕稅課亦可暢旺開具節略呈請核辦查其節略所開係請按照鎮江關現行章程凡商人請領三聯報單應具切結若限內貨未到口罰繳正稅六倍若貨已抵口即將正稅三倍暫存如該貨實運外國將所存之出口正稅與子口半稅照章扣收其餘發還該商若不運出外國即將所存之數轉送盤局抵留各等語 臣等查洋商請領報單採買土貨原應限內出口回國是以此項報單只准洋商請領華商不得比照辦理乃近來洋商採買土貨並不概運出口華商希圖免盤又往往假名洋商冒領報單洋商亦樂於包庇以坐分其利詐僞百出莫可窮詰稅司所呈各節自係為整頓稅項杜絕流弊起見 臣等再三商榷與其辦理兩歧徒滋影射何如改歸一律以昭大公擬即照該稅司所引鎮江關章程推行各關一體照辦華商請

領報單免納內地釐金仍完子口稅況前所買土貨未必概運出洋則多收倍半之稅留抵釐金亦尙有  
益無絀似於 國課商情兩有裨益如蒙 俞允卽由 臣等札飭總稅務司及各行南北洋大臣轉飭各  
海關監督定期開辦得 旨如所議行○庚午 上幸 醇賢親王邸第請 皇本生妣金棺前致祭○  
鹿傳霖奏 臣承准軍機大臣字寄光緒二十二年四月十九日奉 上諭鹿傳霖奏派派營勇嚴防竄回  
並預籌辦理應對情形一摺覽奏均悉應對本係川屬近來該番官與明正土司互鬧恃強藐法自應及  
早圖維預籌布置著卽乘嚴防竄回之便揀派明幹大員添募得力營勇馳赴打箭爐駐紮不動聲色相  
機妥辦如贖對有機可乘卽行進撫土民收回該地以固川省門戶總期辦理得人務令藏番心折毋至  
激生事端是爲至要將此諭令知之欽此遵 旨寄信前來遵查 臣前將贖對番官恣橫情形并派委提  
督周萬順統帶防勇四營進駐打箭爐藉防甘回兼以鎮懾該番並因朱窩章谷兩土司之案派委候  
補知府羅以禮知縣穆秉文先後帶勇前往相機查辦均經陳奏在案乃穆秉文羅以禮先後行抵爐城  
先派差弁前往開導朱窩章谷兩土司不准勾結贖番聽候剖斷該差弁行至中途卽聞贖番已發傳牌  
聲言帶兵前來斷案追該差弁與角洛汎把總盧鳴揚行抵章谷贖番前站十餘人先期已到隨有贖番  
仵仲則忠扎霸噶德等率領馬隊百餘人直抵章谷稱傳大小頭人勒令出具投贖字據並欲調集兩土

司判案該頭人等諍以向眾商議為詞未經出給字據稟文聞信隨即星馳出關前往開導乃該瞻番  
狡稱朱章土司應歸伊管理並陸續添兵數百名勢將抗拒此瞻番帶兵越界侵擾不服開導之大概情  
形也伏查瞻對番官驕橫積久頻年屢次糾眾恐嚇川屬附近土司藉端干預經前督臣劉秉璋暨臣迭  
次咨請駐藏大臣譚行商上乃一味庇縱並不約束以致該瞻番心有所恃愈無忌憚上年與明正土司  
越界搆兵經臣與李煥先後奏請將駐瞻僧俗番官撤參欽奉 諭旨當即恭錄咨明藏中譚行遵照乃  
並不遵照撤換且為之囑囑置辯以致該瞻番益復不知斂跡輒敢帶兵越界滋事干預章谷土司案件  
勒令暫立投瞻字據追經委員前往切實開導仍敢玩不遵從添兵抗拒是該革番官既經抗 旨於前  
復敢肆擾於後藐玩梗頑形同叛逆若再不示以兵威稍加懲創不特該革番官無所畏懼難期懾服且  
恐川屬土司畏其強橫以漢官不能保護勢將紛紛依附該番邊事將不可收拾臣前奏尚欲設法徐圖  
今則實逼處此不能不憤以軍威然猶未敢遽行用兵現已批令羅以禮迅速輕騎出關親往開導曉以  
利害禍福臣已一面咨明訥欽轉飭商上如其稍知悔禍斂兵回巢尚可從寬免其剿辦倘竟執迷不悟  
勢不得不聲罪致討臣惟有持重以圖先飭羅以禮添調漢土官兵厚集兵力並催令周萬順帶隊隨程  
前進會商妥辦奏詞伐罪仍再咨明藏中實以既不遵 旨撤換復不派員會辦該革番官竟敢越境滋

事致干 天討該番自取管戾亦無可藉口狡辯也又奏 前奉電寄 諭旨以廓爾喀與西藏失和  
意欲決戰飭 臣派員馳往設法解散勿令起事等因欽此遵卽飛咨駐藏幫辦大臣訥欽查探起衅情形  
並飛札署後藏都司耿紹宗確探稟報一面據派分省補用知府李毓森航海取道印度前往廓藏查探  
確實設法解散之後就近隨同訥欽辦理印藏劃界事宜當經陳奏在案茲准訥欽查明咨稱確查廓藏  
現在別無衅端惟唐廓界務兩處前均勘定有案近年廓夷邊民運米因與藏番掉換食鹽爭價不一輒  
以碑界劃址不符互相爭論稟請委員查辦上年五月經奉煥奏委署後藏都司耿紹宗率領番官前往  
該處會同廓目勘辦嗣據耿紹宗稟稱查勘拉木屬之漳木有新舊鐵鎖橋二處番官以舊橋爲界執  
有咸豐三年字據爲憑而廓目則以新橋爲分界之區互相爭執日久未結正催辦間旋於三月初旬接  
到廓爾喀王來稟據稱經在邊囑業將番官所執咸豐三年斷牌鈔來查驗屬實漳木界址情願遵依惟  
絨轄所屬熱隆地方係乾隆年間所立界碑今被藏番將界碑遷移熱隆相距二三百里之遠懇情轉飭  
唐古忒將碑仍行遷還原處已飭駐藏噶叭丹赴轅求爲作主等情訥欽傳詢噶叭丹據稟如前且稱有  
碑記可證隨札委後藏糧務候補知縣胡用霖傳集噶布倫等詳查商上舊卷有何實據呈出剖斷並詳  
加開導不可因此失和滋事刻尙未據稟覆將來如查有實據再行派員會勘方能折服至於失和決戰

現查並無其事然廓悍藏愚將來以界務爲詞亦難保無構衅興兵之事至英俄有無暗中主使以目下情形而論尙無確據惟人言嘖嘖恐非無因已將詳細情形具奏并鈔送廓爾喀王原摺呈送軍機處查核等因咨覆前來旋據署後藏都司耿紹宗查探稟復所陳廓藏界務兩事亦與訥欽來咨情形大致相同惟稱上年秋冬之間廓爾喀國內曾有派兵五千人赴藏之語近邊地方人心惶惑有遷避者經該都司再三開導彈壓始定現在津木邊界之案已結訪查實無失和構兵之事至廓爾喀實因米鹽互換爭論多寡各執一詞而以界務爲名若米鹽通商議定卽絀轄界務似亦易結該都司已將詳細情形就近聲明訥欽派委後藏糧員候補知縣胡用霖妥爲查辦等情據此臣查廓藏失和構兵之說訥欽近在咫尺既查無其事自屬可信惟此語既出自英人之口其中恐別有詭謀未便稍涉大意且印藏勘界久已遲逾印茶行藏轉瞬卽屆昨接訥欽來函並照鈔藏番公函仍復執迷不悟始終抗違近且密募糧回數十人運來機器鐵筒製造鎗礮意圖禦英似此愚梗情形聞之實深焦灼查川省委員李毓森已抵上海不日出洋臣趕將現在查覆情形密電飭知仍令體程前往於抵印度時不露聲色密爲察探如無須赴廓卽入藏隨同訥欽勸導藏番商酌勘界事宜相機妥辦現在新任駐藏辦事大臣文海業已行抵川省臣當將藏事一切情形詳細告知與之逐細商酌妥籌以期仰副 聖主綏輯邊疆消患未萌之至意其

廓爾喀王原稟及藏番公稟已准訥欽咨稱一併照鈔咨送軍機處及總理衙門查核自毋庸再行鈔送  
上諭軍機大臣等鹿傳霖奏瞻對番官現復帶兵出巢越界侵擾不服開導及擬辦情形一摺瞻對番  
官上年與明正土司越界拏兵經鹿傳霖等將駐瞻僧俗番官先後撤參均經降旨允准乃該革番官並  
不遵照撤換近復帶兵越界滋事干預章谷土司案件勒令禁止投瞻字樣迫令委員前往切實開導仍  
敢抗不遵從添兵抗拒藐玩梗頑形同叛逆自應懾以兵威著鹿傳霖卽飭驅以禮出關再行開導曉以  
利害一面咨明訥欽轉飭商上如其稍知悔禍領兵回巢准從寬免其剿辦倘仍執迷不悟卽著厚集兵  
力妥籌進剿惟打箭爐與滇邊相通該處教民雜處尤恐勾結爲患該督務當穩慎以圖不可任其越界  
侵擾亦不可因此激成邊衅是爲至要另摺奏委員李毓森俟抵印度時密爲偵探等語與前寄電論適  
相照合卽著照所議辦理將此由四百里諭令知之○辛未 上幸 醇賢親王邸第詣 皇本生妣金  
棺前行選奠禮○賞連順副都統銜作爲科布多參贊大臣○諭陶模奏特參貪劣武員一摺記名提督  
借補陝西定邊協副將劉連陞於請領火藥彈丸私行變價入己復於沿途索支運費平日不事操防實  
屬貪劣不職劉連陞卽行革職並撤銷勇號拔去翎枝以肅戎行○陶模等奏去年回匪竄擾甘涼臣  
模奏派總兵趙有正統帶新軍馬步隊四營旗入關防堵進紮山丹時河邊悍回麇集北大通營一帶據

爲巢穴正月間統帶連盛軍總兵劉璞統帶鎮南等營總兵易順勝約同趙有正由扁都口老虎溝分路進剿十四日趙有正及甘標毅武後營遊擊黃文新等督率馬步練軍深入收復永安營城連夜銳進攻圍北大通營城管帶新軍前營步隊副將魏其德肉薄先登中鎗陣亡管帶新軍左旗馬隊提督陳國明及黃文新皆受重創陣亡哨官四員勇丁五十二名我軍亦殺賊四百餘名擊斃賊酋劉復等二名賊眾喪膽其時易順勝等以山路崎嶇失期未至賊見官軍無後繼之師糾眾七八千傾城猛撲趙有正率孤軍衝突鏖戰數日退守永安二十九日劉璞偕參將朱萬榮等帶隊往援深山乏糧趙有正卽於是日還察漢俄博營正月杪臣模在安西途次得信飭令堅守以待大軍剿會二月中旬臣模行抵甘州卽派行營總理營務處甘肅補用道潘效蘇等率親軍馬步諸營仍由扁都口進北大通會同甘軍剿辦臣福祥先已飭令甘軍營務處分省補用道張成基統帶左軍馬隊等營副將張銘新統帶鎮南靖洮馬步等營副將馬安良等由西寧進規北大通二月初八日迎冰遠阪擊退憑河悍賊乘勝渡河將北大通營城克復進至大小沙溝連破二堡陣斬一千餘名生擒逆目三名餘匪二百餘名一併正法其餘賊堡林立馬安良遣人諭令投誠適臣福祥檄調張成基馬安良回紮古鄯驛各賊堡仍復抗拒無就撫之意查北大通營城在大通河北岸城以西沙磧荒灘向無莊村城以東河北有八大回莊曰小沙溝莊曰大沙溝莊

曰牙豁莊曰大莊曰旱嶺莊曰黃田莊曰全溝壑莊曰俄畔莊河南有二大回莊曰瓜喇莊曰陰田莊共計十大回莊每莊有附近小堡張銘新等既攻克大小沙溝二莊而牙豁莊爲劉四伏老巢賊尤強悍三月初四日張銘新約同趙有正出其不意五鼓進攻張銘新率隊由東北道有正由西南兩軍夾擊立破其巢因乘勝移攻大莊趙有正率所部在堡前誘賊張銘新繞出賊後奮力攻擊該逆腹背受敵勢不能支遂將大莊攻克旱嶺莊賊見我軍連克二莊不戰而潰計三莊共殺賊一千餘人此外尙有大莊惟黃田黃山面河侯牆堅厚環閉鎗孔攻擊最難初八日游效蘇會同記名副都統奇克仲布等駐紮大通營城議定先剿黃田莊悍賊次及南北兩岸各莊之賊十一日統帶督標親軍正中馬步等營副將焦大聚率馬步大營馳赴旱嶺莊紮營未畢黃田莊賊攻我不備蜂擁而來我軍堅持不動賊愈驅愈近鎗傷築營勇丁數人時河灘山上徧地皆賊焦大聚易順勝分路出隊焦大聚派總哨記名總兵易盛富率中哨步隊由中路進前哨左步隊由山左邊進後哨右步隊由山右邊進右營管帶參將周陞朝左營管帶參將徐春先右營管帶參將金蘭益後營管帶遊擊周得金各率馬隊從右邊河灘包抄焦大聚自率親兵馬隊督剿從山坳橫截而出易順勝率鎮南右營總兵張玉魁率鎮夏左營都司陳松泉率武毅後營守備陳兩慶率慶字營都司陳明山率正威右營各步隊都司許春廷率靈字營馬隊分路策應布甞已定



易盛宮先由旱臺莊後將山下磨房內匪賊圍殺淨盡踰溝上山左右步隊奮勇齊進由高壓下鎗礮齊施右邊河灘馬隊橫掃而前賊勢不支紛紛收入堡內我軍步隊跟追而入立將黃田莊攻克該逆從堡內竄出馬隊迎頭截殺內外夾擊橫屍徧地又乘勢將黃田莊東北二里許之全溝莊攻克兩莊共斃賊千餘名撲河奔竄淹斃者無算日暮收隊焦大聚復於夜間帶隊搜殺黃田莊外匪匪六十餘名至是河北祇俄博河兩祇瓜喇陰田三莊未下奇克伸布與潘效蘇商議乘此機會分道進攻爲一鼓蕩平之計張銘新趙有正渡河先攻瓜喇莊次及陰田焦大聚易順勝先攻俄博莊渡河會攻陰田議既定張銘新趙有正於十二日天未明帶隊齊集河干以馬渡步進距瓜喇莊二里許瞻霧棚漫賊未及覺張銘新率步隊攻西北筋參將王時應率甘軍前旗馬隊截賊必走之路趙有正率親軍中營前營朱萬榮率毅武中營各步隊攻東南左旗營帶遊擊李喜恩右旗營帶都司張守祥毅武後營幫帶守備胡弼英各率馬隊攔賊去路合力圍攻不一時許立將瓜喇莊攻克殺賊三百餘名其由堡內逸出者又經馬隊截殺數十名焦大聚等於十二日黎明率隊由黃田進攻俄博莊馬步各營仍分三路夾擊克之焦大聚復乘勝連克莊外諸小堡殺賊三百餘名是日奇克伸布潘效蘇率開花礮隊循河北岸東進行數里見隔河瓜喇莊隱隱火起人聲沸天又行十餘里至陰田莊對岸莊賊傾巢出集河邊拒敵勢將渡河北竄因

飭營帶開花礮隊守備胡得貴軍功張得元隔河擊斃賊數十人適瓜喇俄博之軍先後齊集焦大聚  
率周得金周陞朝等見水而南合力圍殺斃賊二百餘人該逆紛紛投河溺斃各軍還攻入堡立將陞田  
莊攻克卽下令於南北兩岸山上搜殺三日共殺四百餘人收撫老弱男婦三千餘人通計十莊逆回斬  
殺三千餘名淹斃者以數千計擒斬逆目包明馬元等八十餘人奪獲器械馬匹無算我軍亦陣亡勇丁  
二十餘名受傷一百餘名查大通營城河南北十大莊回匪著名兇悍與上五莊哆巴一帶逆回互爲倚  
角去年竄擾甘涼所屬永昌山丹諸縣攻陷民堡數十南山一帶幾無淨土臣福祥派隊將北大通營城  
收復業經電奏在案各將士仰仗 天威先後會攻北大通附近各回莊痛加剿洗一律肅清實足快人  
心而伸 天討此次在事出力員弁合無仰懇 恩施准臣模臣福祥開單擇尤保獎並查明陣亡弁勇  
彙報請卹以示激勵得 旨覽奏均悉所有出力將弁准其擇尤保獎毋庸濫陣亡弁勇並著彙報請  
卹○壬申 皇本生妣金棺奉移園寓 上幸 醇賢親王邸第行奉移禮後詣倚虹堂目送○以張英  
麟爲內閣學士○癸酉 上詣 奉先殿 壽皇殿行禮○諭軍機大臣等文海奏到川日期並籌商藏  
事情形一摺據稱藏番現在情形非懾以兵威於事無濟擬招勇五百名帶領進藏以壯聲威著照所請  
並著迅速前往毋稍遲延所需餉銀每月二千兩卽著鹿傳霖按月籌給本日又據給事中吳光墉奏藏

事孔亟宜籌備禦一摺及塘巴塘一帶爲四川入藏門戶該給事中請於該處設立漢官假以事權招徠川省商民前往墾荒並採辦礦產各節係爲預杜窺伺起見著鹿傳霖確查壤塘巴塘一帶情形如能招徠商民墾荒開礦洵於時局有益並著文海訥欽會商妥辦另片奏開辦藏務請於邊防經費等項內每年劃銀二三十萬應用等語各項協餉均關緊要川省有無別款可撥著鹿傳霖妥爲籌議至所稱調安定勇五營移割雪山一帶是否可行並著該督等酌籌辦理吳光奎摺片各一件均著鈔給閱看將此由五百里各諭令知之○諭史念祖奏剿除積年巨匪請將知府獎勵一摺廣西泗城府西隆州屬有積匪徐三貢固恃險爲患多年經泗城府知府王方田會督兵練搗其巢穴將徐三並其子徐麻六其孫徐小津等殺斃並生擒匪黨多名奪獲器械甚多王方田督率營勇旬日之間渠魁授首辦理尙爲妥速泗城府知府王方田著准其酌量請獎以示鼓勵○甲戌 上詣 醇賢親王園寓 皇本生妣金棺前行禮○鹿傳霖等奏西藏番性頑梗見小利而昧遠圖自印藏通商靖西雖已開闢而番衆懷疑莫釋動輒從驚不遵等先後抵川接晤籌商以冀保全和局因思頑愚異俗之倫必其氣類相同及素所信服者則其言易入庶可感化其心查有棍噶扎拉參呼圖克圖嘉穆巴圖多尊前於光緒九年奉 旨入藏熬茶在彼二年衆番極爲悅服嗣經前任四川督臣丁寶楨專疏薦舉蒙 恩准令入覲後飭回甘肅擇地建

立寺院經恭祝 皇太后六旬萬壽現在洮州臣昔任川藩時正值該呼圖克圖入藏之際常與往還  
爲日甚久深悉其賦性忠誠才識闊遠洞曉西北形勢而且感戴 聖恩每思報効今臣訥欽腹藏之初  
亟當宣播 朝廷威德曉諭番衆化其頑梗之積習以期無礙於通商然野性難馴恐非正論婉言所能  
感喻誠能得其夙所心服如棍噶扎拉參呼圖克圖者助臣訥欽竭誠開喻不惟語言相通抑且聲氣相  
感其商上及番衆人等必能聽從該呼圖克圖之化導盡泯猜嫌不致再與英人抵牾則通商和局庶可  
長久相安至該呼圖克圖閱歷已深頗知權變必能和衷商辦輕重適宜臣俾霖知之最稔實可保其無  
他方今邊患日棘得幹濟之才用之輕熟之地必有成效可觀臣等籌維至再意見相同合無仰懇 天  
恩飭下陝甘總督臣傅齡棍噶扎拉參呼圖克圖迅速來川與臣俾霖會商後即行赴藏俾臣訥欽得與  
隨事商辦以通番情而裨和局得 旨允行○乙亥諭依克唐阿等奏宗室官員疏防圍禁人犯據情參  
處一摺前因案移居奉天之宗室如山屢次脫逃既經奏明解回圍禁該看管等官如何嚴加防範乃  
甫經到配又復潛逃株屬疏忽看管官宗室營主事春熙專管官記名副族長學鑑德保著交宗人府分  
別議處仍飭令嚴拿逃犯如山務獲牢固圍禁嗣後該管各官於發遣宗室人犯務宜加意嚴防倘再仍  
前疏忽卽著從嚴參辦○中日通商行船條約成其文曰 大清國 大皇帝陛下及大日本國大皇帝

陸下因光緒二十一年三月二十二日即明治二十八年四月十七日馬關所訂條約第六款聲明商訂通商行船條約是以 大清國 大皇帝陛下特派 欽差全權大臣總理各國事務大臣尙書銜戶部左侍郎張大日本國大皇帝陛下特派欽差駐劄北京全權大臣正四位勳一等男爵林爲全權大臣彼此將所奉全權文憑校閱均屬妥善會同議定各條款開列於左 第一款 大清國 大皇帝陛下與大日本國大皇帝陛下及兩國臣民均永遠和好友誼敦睦彼此臣民僑居其家財產皆全獲保護無所稍缺 第二款 大日本國大皇帝陛下可任便派一秉權大員駐劄中國北京 大清國 大皇帝陛下可任便派一秉權大員駐劄日本國東京兩國所派秉權大員應照各國公法得享一切權利並優例及應豁免利益均照相待最優之國所派相等大員一體接待享受其本員及眷屬隨員人等並公署住處及來往公文書信等件均不得攪犯擅動凡欲選用役員使丁通譯人及僕婢隨從等均准隨意僱募毫無阻攔 第三款 大日本國大皇帝陛下酌視日本國利益相關情形可設立總領事領事副領事及代理領事駐中國已開及日後約開通商各口岸城鎮各領事等官中國官員應以相當禮貌接待並各員應得分位職權裁判管轄權及優例豁免利益均照現時或日後相待最優之國相等之官一律享受 大清國 大皇帝陛下亦可設立總領事領事副領事及代理領事駐劄日本國現准及日後准

別國領事駐劄之處除管轄在日本之中國人民及財產歸日本衙署審判外各領事等官應得權利及優例悉照通例給予相等之官一律享受 第四款 日本臣民准帶家屬服役僕婢等在中國已開及日後約開通商各口岸城鎮來往居住從事商業工藝製作及別項合例事業又准其於通商各口岸任意往返隨帶貨物家具凡通商各口岸城鎮無論現在已定及將來所定外國人居住地界之內均准賃買房屋租地起造禮拜堂醫院墳塋其一切優例豁除利益均照現在及將來給與最優待之國臣民一律無異 第五款 中國現已准作停泊之港如安慶大通湖口武穴陸溪口吳淞等處及將來所准停泊之港均准日本船卸載貨物客商悉照現行各國通商章程辦理如日本船違章到中國別口非係准停泊之港亦非准通商口岸或在沿海沿江各處地方私做買賣即將船貨一併由中國罰充入官 第六款 日本臣民准聽持照前往中國內地各處游歷通商執照由日本領事發給由中國地方官蓋印經過地方如飭交出執照應隨時呈驗無訛放行所有僱用車船人夫牲口裝運行李貨物不得攔阻如查無執照或有不法情事就近送交領事官懲辦沿途止可拘禁不可凌虐執照自發給之日起以華十三箇月爲限若無執照進內地者罰銀不過三百兩之數惟在通商各口岸有出外游玩地不過華百里期不過五日者無庸請照船上水手人不在此列 第七款 日本臣民在中國通商各口岸可僱用中國

人民辦理合例事務中國政府及官吏不得阻礙禁止 第八款 日本臣民任從自僱船隻運貨客  
不論何項船隻僱價銀兩聽其與船戶自議中國政府官吏均無庸干涉其船不得限定隻數並不准船  
戶挑夫及各色人等把持包攬運送等情倘有走私漏稅情弊查出該犯自應照例懲辦 第九款 凡  
各貨物日本臣民運進中國或由日本運進中國者又日本臣民由中國運出口或由中國運往日本者  
均照中國與泰西各國現行各稅則及稅則章程辦理凡貨物於中國與泰西各國現行稅則及稅則章  
程之內並無限制禁止進出口明文亦准任便照運其運進中國口者只輸進口稅運出中國口者只輸  
出口稅至日本臣民在中國所輸進出口稅比相待最優之國臣民不得加多或有殊異又凡貨物由日  
本運進中國或由中國運往日本其進出口稅亦比相待最優之國人民運進出口相同貨物現時及日  
後所輸進出口稅不得加多或有殊異 第十款 凡貨物照章係日本臣民運進中國或由日本運進  
中國在中國照現行章程由此通商口運至彼通商口時不論貨主及運貨者係何國之人不論運器船  
隻係屬何國所有稅賦鈔課釐金雜派各項一概豁免 第十一款 日本臣民有欲將照章運入中國  
之貨進售內地備關一次納稅以免各子口徵收者則聽自便如係應完稅之貨則應照進口稅一半輸  
納如係免稅之貨則按直每百兩徵收二兩五錢輸納時領取票據執持此票內地各徵一概豁免惟運

進鴉片煙不在此條之內 第十二款 日本臣民於中國通商各口岸之外購買中國物貨土產爲運出外洋者除出口時完出口正稅外如照以上第十一款所列數目照出口稅則核算完納子口稅以抵各子口稅項此後不論在中國何處所有稅賦鈔課釐金雜派一概豁免惟完子口稅之日起限十二箇月內運往外國又日本臣民在通商各口岸購買中國物貨土產非係禁運出外洋之物運出口時只完出口正稅所有內地稅賦鈔課釐金雜派一概豁免又日本臣民在中國各處購買貨物以備運出外洋准由此通商口岸運到彼通商口岸惟應照現行章程條規辦理 第十三款 凡貨物如實係洋貨已完進口稅後自進口之日起限三年內不論何時准日本臣民復運出口俾往外國毋庸再納出口稅惟復運出口之貨須實係原包原貨並未拆動抽換准將已完之進口稅由海關給發收稅存票付執如該臣民願持票赴關領取現銀者聽 第十四款 中國國家允在通商口岸設立關棧所有章程日後酌定 第十五款 日本商船進中國通商各口應納船鈔按註冊噸數在一百五十噸以上者每噸納鈔銀四錢一百五十噸及以下者每噸納鈔銀一錢如該船進口後未經開艙欲行他往限四十八點鐘之內出口不納船鈔如已納船鈔之船自領出口紅票之日起限四箇月之內可往中國通商各口及准停泊之港毋庸再納船鈔凡日本商船在中國修理之時亦毋庸納船鈔又日本臣民使用各種小船裝運



客商行李書信及應免稅之貨往來中國通商各口均毋庸納船鈔惟各種小船及貨艇等運往貨物其貨於運載時應輸稅課者該船須按四箇月納船鈔一次每噸納銀一錢所有日本大小船隻除納船鈔外並無別項規費至所納船鈔不得過於最優之國各船所納之數 第十六款 日本商船進中國通商各口聽其僱覓引水之人完清應納稅項之後亦聽僱覓引水之人帶領出口 第十七款 日本商船遇有損壞或別項事故致遇危險之處不論中國何處准其駛進附近各口暫泊毋庸納船鈔其船應修理起卸貨物報歸海關委員查察則毋庸納稅凡日本船在中國沿海地方碰壞擱淺中國官員須立即設法救護搭客及船上一切人等並照料船貨所救之人當加意看待並隨時察看情形有須設法護送者即妥送就近領事官查收如中國商船遇有損壞或別項事故遇入日本附近海口暫避日本官員亦照以上所載一律辦理 第十八款 中國通商各口岸官員凡有嚴防偷漏之法任憑相度機宜設法辦理 第十九款 日本船隻被中國強盜海賊搶劫者中國官員即應設法將匪徒拿辦追贓 第二十款 日本在中國之人民及其所有財產物件專歸日本委派官吏管轄凡日本人控告日本人或被別國人控告均歸日本委派官吏訊斷與中國官吏無涉 第二十一款 凡中國官員或人民控告在中國之日本臣民負欠錢債等項或爭在中國之財產物件等事歸日本官員訊斷凡在中國日本

官員或人民控告中國臣民負欠錢債等項或爭中國人之財產物件等事歸中國官員訊斷 第二十  
二款 凡日本臣民被控在中國犯法歸日本官員審理如果審出真罪依照日本法律懲辦中國臣民  
被日本人在中國控告犯法歸中國官員審理如果審出真罪依照中國法律懲辦 第二十三款 中  
國人有欠日本人債務不償或詭詐逃避者中國官務須嚴拿追繳日本人有欠中國人債務不償或詭  
詐逃避者日本官亦應一體辦理 第二十四款 日本人在中國犯罪或逃亡負債者潛往中國內地  
或潛匿中國臣民房屋或船上一經日本領事照請即將該犯交出中國人在中國犯罪或逃亡負債者  
潛匿在中國日本臣民所住房屋或中國水面日本船上一經中國官照請日本官即將該犯交出 第  
二十五款 按照中國與日本國現行各約章日本國家及臣民應得優例豁免利益今特申明存之勿  
失又 大清國 大皇帝陛下已經或將來如有給予別國國家或臣民優例豁免利益日本國家及臣  
民亦一律享受 第二十六款 此次所定稅則及此約內關涉通商各條款日後如有一國再欲重修  
由換約之日起以十年為限期滿後須於六箇月之內知照酌量更改若兩國彼此均未聲明更改則條  
款稅則仍照前辦理復俟十年再行更改以後均照此式辦理 第二十七款 今兩國欲照此次  
所立條約遵行須商定通商章程規惟於未定以前應照中國與泰西各國現行章程條規與此約所

訂不相違背者兩國一律遵辦 第二十八款 本條約繕寫漢文日本文英文署名爲定惟防以後有所辯論兩國全權大臣訂明如將來漢文日本文有參差不符均以英文爲準 第二十九款 本條約兩國 大皇帝批准後在北京迅速互換日期由本日署名起至遲不逾三箇月爲此兩國全權大臣署名蓋印以昭信守 附件一 大清欽命全權大臣總理各國事務尚書銜戶部左侍郎張蔭桓會同照得現訂中日通商行船條約日本臣民應得優待利益均經詳載惟中國商民如何辦法屢經商論貴大臣以按照歐洲條約並無華民在外國一律優待之條本大臣舉與國條約相證貴大臣以奧國路連華民足跡不到故奧國肯許於約惟本大臣重駁馬關條款有此次商約以歐洲各國條約爲本美國本有一律優待之約貴大臣謂美非歐洲似也然則奧斯馬加非歐洲帝國乎貴大臣若按照馬關約辦理以歐洲各國約章爲本則奧國之約不能抹煞不算貴大臣屢言貴國家無不優待華人但不必分註約內貴大臣言必有信本大臣深相敬佩現在約款大致已具惟中國商民商船往來貴國者貴國究何以處之向所貴大臣查照歷次會議問答迅賜見覆爲荷須至照會者 附件二 大日本國欽差全權大臣男爵林爲照覆事明治二十九年七月二十一日接准照稿現在中日通商行船條約大致已具惟中國商民商船往來者貴國究何以處之等因前來按查歷次會議問答貴大臣屢以優待華人一節爲旨而

本國大臣不肯分註約內者我國近與歐美各國更改條約數年之內應開通國俾各該國人往來居住從事生業此次中日約內若將優待華人一節一經分註屆時不可不照歐美各國人應得優例一律辦理願觀貴國未開通國日本臣民除在通商口岸居住從事生業外其往來內地者亦為條約所限制不甚自便彼此所享大形輕重且貴國與別國訂立通商條約雖有華民應得按照相待最優之國一律相待之條後因於該國內之益有所妨礙或與該國內或該國內一處地方之平安有所妨礙該國終立限制之條貴大臣當能記憶也若夫奧國華人稀到所有條約未可比照而論以上情節本國大臣屢與貴大臣會議業已面告一切矣至其將貴國商民商船應如何辦理之處苟非於國內之益或平安有所妨礙我政府務期公允而昭睦誼須至照覆者 附件三 大清欽命全權大臣總理各國事務尚書銜戶部左侍郎張蔭桓為照會事案查馬關約第八款內開中國為保明認真實行約內所訂各款聽允日本軍隊暫行佔守山東省威海衛又於中國將本約所訂第一第二兩次賠款交清通商行船條約亦經批准互換之後中國政府與日本政府確定周全妥善辦法將通商口岸關稅作為贖款並恩之抵押日本可允撤回軍隊等語兩國自應照依辦理今第一第二兩次賠款業經如期交清通商行船條約已經本大臣與貴大臣逐款議定於六月十一日署名蓋印訂明至遲不逾三箇月在北京互換一俟此次通商行

船條約互換後中國政府自可與日本政府妥商贖款及息如何交收以便撤回駐威軍隊此次按照馬關約辦理應卽備文照會貴大臣查照並祈見復爲荷須至照會者 附件四 大日本國欽差全權大臣男爵林爲照覆事明治二十九年七月二十一日接准照稱此次通商行船條約互換後中國自可與日本政府妥商贖款及息如何交收以便撤回駐威軍隊等因前來案查此層其應如何辦理之處馬關條約載有明文除遵照外本衙大臣似勿庸贅一辭須至照覆者 附件五 大日本國欽差全權大臣男爵林爲照會事本日經署名蓋印之中日通商行船條約第九款內開凡各貨物日本臣民運進中國或由日本運進中國者又日本臣民由中國運出口或由中國運往日本者均照中國與泰西各國現行各稅則及稅則章程辦理等語所有日本事應按照美國華稅則一律辦理特此聲明須至照會者 附件六 大清欽命全權大臣總理各國事務衙門部左侍郎張爲照覆事頃接來文內開本日經署名蓋印之通商行船條約第九款內開凡各貨物日本臣民運進中國或由日本運進中國者又日本臣民由中國運出口或由中國運往日本者均照中國與泰西各國現行各稅則及稅則章程辦理等語所有日本事應按照美國華稅則一律辦理特此聲明等語披閱之餘本大臣並無異議特此備文聲明可也須至照覆者 附件七 日本林大臣說帖 自去冬十二月二十九號開議商約將闕半年尙無成

議按馬關條約日本臣民僑寓中國已得按照相待最優之國臣民一律相待是則商約不定於日人固無窒礙此顯而易見者也然商約未定究非有裨於兩國睦誼本大臣深懷此議極願此約從速議成故於前交李大臣原稿之中曾酌改大半滿謂必邀允諾不料貴大臣重加刪駁至爲歉然本大臣素願以和衷共事終始不渝茲再就來稿細加酌量再三商讓審時度勢本國家能許讓者本大臣於此次改稿一一允許若如此將就仍復見駁本大臣卽萬無再讓之處惟有堅持此次擬稿必至罷議而後已矣此約成否在此一稿維貴大臣實圖之至日本臣民在中國機器造貨免抽釐稅一節馬關條約既准日人機器製造若尙須徵收釐稅斷無不提及之理蓋收稅者卽與機器製造原意權利背棄也是馬關約第六款應照本國家所立見解乃爲妥協但審貴大臣詞意貴國家於此一節見解迥殊此時既無從解釋本大臣擬將此節於新約內不提一俟起有專案卽按馬關約應如何譚解辦理若貴大臣仍復堅持不允深恐此約成議無期爾時中國國家及中國臣民在日本者既無條約之權利自必諸多窒礙望細思之至馬關約所載字句詞意遲早總當商議辯解則候案另商於中國似尙無礙若區區以抽稅一層與此約合辦則商約恐難成議利害相形尙望裁奪不勝切盼之至 附件八 覆日本林大臣說帖 四月十六日貴大臣送來說帖並續改約稿閱悉一切貴大臣謂商約自去冬十二月二十九號卽中曆十

一月十四日由李中堂開議將閱半載惟本大臣奉 命接辦始於本年正月二十八日與貴大臣會議  
本大臣日行公事本極繁重早荷貴大臣涵鑒此次約稿又最緊要條目紛如既不敢輕率從事自難倉  
卒告成曷以會議逐款詳論繁微博引筆舌並勞固非託故延宕當亦貴大臣所鑒諒也彼此相讓再三  
酌改僅逾三月大致已具亦不得謂之遲緩矣至在中國機器製造貨物徵收稅項一節本大臣屢次與  
貴大臣面晤和衷商議以期妥籌善法今閱台牘貴國仍執前議必欲別開另商意者本大臣歷次面談  
尙有未能詳盡者乎查馬關條約祇言內地運送稅內地稅鈔課雜派以及在內地沽及寄存棧房之益  
耳至製造貨物離廠等稅應否豁免一字未提如果可以免徵斷無不提明之理既不提及其爲應徵自無  
疑義且中國係自主之國原可任便妥定公平章程徵收稅項若慮中國將製造貨稅加重苛徵使製造  
之權利化爲烏有無乃以不公不平相待乎中國應徵製造貨之離廠稅不過以之抵所失洋貨之進口  
稅於就貨抽稅之間仍寓恤商惠工之意貴大臣擬將此款於新約內不提又以馬關條約字句詞意遲  
早總當商議辦解於中國無礙若區區以抽稅一層與此約合辦則商約恐難成議具紉貴大臣和平忠  
亮之雅惟是事關國課義重國權條約中既未議去然則中國分內所應爲之事貴國政府當不見怪也  
各國商情所繫有以徵稅爲損者亦有以不徵稅爲損者統俟晤數纒言之詳閱此次改稿已較前稿通

融此中仍有數款尙須面商方能定議擬請貴大臣於本月十五日以後何日得暇酌定准期以便會議可也○丙子子故江西布政使陳澧祭葬戰功事蹟交國史館立傳○諭軍機大臣等有人奏江蘇候補知府譚泰來歷充海運滬局總辦與招商局文報總辦管理漕務之王松森信用司事阻撓桐營私舞弊專俟海運壟斷取盈等語著劉坤一卽行飭確切查明據實具奏毋稍徇隱原片著鈔給閱看將此諭令知之○陶模等奏應祺前開西甯回賊有糾股出竄之信當卽電商上模與伊犁將軍長庚喀什噶爾提督張俊妥籌布置意見相同業將派隊馳赴前敵以備防剿情形馳報在案四月初三四日探聞巨股回賊由王子營竄近安玉應祺以安玉爲新疆門戶當飭東路各營加意嚴防惟查安玉與敦煌南山一帶東通青海西甯西至羅布淖爾綿延數千里隘口紛雜防不勝防正慮兵力太單不敷分布忽於四月初七日據駐防玉門提督牛允誠電稱賊已竄至距玉門百二十里之昌馬該處僉民求救甚急卽於所部馬隊兩旗中挑帶四哨馳赴援初八日清晨悍賊千餘騎徑撲昌馬該提督整隊進至蔡莊迎頭截擊鏖戰六七點鐘之久縱橫盡決鎗聲連環斃賊百數十名陣斬黃旗賊目馬茂効卽老依一名生擒八名受傷不計其數奪獲騾馬六匹軍械多件賊遂敗竄入山我軍陣亡一名受傷二名訊據獲賊供稱自西甯出竄時大小男婦七八萬分爲三股沿途凍餓死者尙衆此股係僞元師劉四伏副目馬古



等所領尙有二萬餘因聞昌馬糧多挑精壯鎗手千餘騎意圖攻陷昌馬搜掠糧食再奔河瑞不意官軍  
猛擊不能前進等語此初八日牛允誠首先接仗以少擊衆立獲奇捷之實在情形也初九日牛允誠復  
督隊進至蔡莊賊已退墮鹽池灣始知官軍隊伍不多意欲糾股報復臣應祺先於初七夜電調副將謝  
典禮馬隊一旗彭禮堂馬隊一營羅平安馬隊一營已抵昌馬初十日賊率大股出拒聞我軍增多遂不  
敢戰又退入八十里之發駝坡負隅自固十一日牛允誠等因山路險窄大隊不能齊進挑選奮勇並鎗  
手八十名入山跟探至距昌馬百二十里之蘇節泉遇賊我軍精騎衝突鎗發無虛斃賊百餘生擒二名  
賊仍竄伏臣應祺以賊衆不能盡殲刊發剿撫兼施簡明告示宣布 朝廷威德賊衆紛紛解體惟劉四  
伏自知罪重不赦分遣悍黨把截山口限衆投誠牛允誠遂於十五日拔隊十六日紮流沙坡十七日出  
隊至扁博溝賊衆萬餘抗拒牛允誠督隊由右謝典禮繼之彭禮堂由左羅平安繼之分路拍進鎗礮雷  
轟自卯至午再接再厲斃賊逾千陣斬逆目馬夾二生擒回目馬三司付賊遂披靡我軍亦陣亡哨弁三  
名勇丁三十餘人受傷七十餘人謝典禮當回收衆二百餘內有回韓金元均送昌馬分別安置此十一  
至十七連日合軍進剿再獲大勝之實在情形也賊經迭次大創衆志愈離劉四伏使衆投誠乘機設詐  
陽謂彼亦願投並遣人來營請示牛允誠知其巨測亦陽與定期詎是夜三更悍賊數千撲營大噪我軍

戒嚴肅隊惡壘近者輒被鎗傷相持至黎明賊猛撲數次我軍奮勇殺出斃賊七八百賊始敗竄乘勢窮追二十餘里賊衆分匿山谷我軍跟蹤搜剿復擒斬三百餘名劉四伏乘間率悍黨逃走投出男婦五千餘人此十八十九日復獲大勝收撫回衆之實在情形也伏思此股回賊河漢兇逆均萃其中在西寧既未投誠其桀悍自可想見沿途雖死亡不少而出關尙二萬有餘若使得踞昌馬一經騰飽豈可復制初八日之戰牛允誠以百餘騎當千餘賊十七八九日之戰合羅平安彭禮堂謝典禮馬步共五營旗千一百餘人而除守坐營外戰者僅八九百人以當萬數千之賊聞者皆爲心危或以輕進言或以被圍告而該提督等驚勇無前摧堅挫銳竟能疊獲奇勝保守玉關此實仰賴 皇上威福非臣愚意料所及此也得 旨劉四伏竄匿鹽池灣營及早掃除以防勾結牛允誠等保案俟擒獲首逆後再降諭旨○潘慶瀾奏募民籍入教爲護符一有爭訟地方官勢須扶教抑民以致良民積憤廣胸教案疊出應請 飭下總理衙門亟行設法消弭軍機大臣奉 旨著該衙門議奏○壬午總理各國事務衙門奏光緒二十二年四月二十一日准軍機處鈔交閩浙總督邊寶泉奏查明船政情形一摺奉 硃批該衙門議奏欽此欽遵到臣衙門據原奏內稱船政之設其經營垂三十年糜帑至千百萬若不及時整頓設法擴充則墮棄前功殊屬可惜等語臣等查船政始於前大學士臣左宗棠成於前兩江督臣沈葆楨機實耐勞實事求

是其所用又多本地寒土布衣草笠親執朴以巡功故弊絕風清爲各省官廠所僅見近十餘年來泰西製造日精日新閩廠出洋回華學生雖不無頓悟之資能自出圖製機而財力短絀既不能添機拓廠又不能製料備材自光緒八九年以來購買現成機器就廠合棚製就實泰鏡清開濟平遠各快船後即得有更新之法亦因無機無廠不能如法更製而木質輪船如同治年間所製之琛航靖遠等船經歲較輕馬力較微者又不合於時用於是製造日稀人多閒曠不得已而裁汰歸併仍爲省費儲貨之謀至於急迫用船則勢須勉捐重資種種喫虧展轉而購諸外國既傷財力復誤事機誠可惜也所請造船宜求實際添置機器募精於工作之洋員督率在事員匠認真講求所造新式巨艦各節應請 旨飭行期以有裨實用原奏又稱物料宜由內地採辦閩省礦務現已遵 旨委查一經興辦當可就地取資其鍊鋼鑄鐵機器必須依法仿造自成機杼等語查一船價值料居七工居三各料之中如鐵煤土木之類爲生料有產自中國者有不產自中國者如鋼甲如鐵甲帆纜之類爲熟料有中國現能自製者有必待僱匠添機拓廠而後能自製者應由船政大臣督同洋員學生隨時考究奏明辦理至煤鐵各礦雖經該督委查將來興辦能否速效應用尙無把握應請 飭下該督不准指吏竄役土藥劣紳阻撓擾亂以期刻日課功原奏又稱學生認真造就從前出洋學生期限大感初無心得經費又太鉅財力未逮不如延致教習

在廠督課等語查船政本有前後兩學堂前學堂習法文學製造後學堂習英文學駕駛學成擇其尤為聰穎者派令出洋在中國既學有根柢再令遊學泰西各大學堂及各國戰艦兵輪以資練習廣見聞此必非在廠一師教授之所能及前據船政大臣會同南北洋奏請派監督帶同出洋已歷三屆所謂置之莊嶽之間也日本現在執政大臣多與我第一屆出洋學生同堂肄業豈中國學生資質盡出人下哉蓋用之則奮發有為人人有自靖自獻之思不用則日就頹落人人有自暴自棄之心聞船政學生學成回華後皆做處無事飢寒所迫甘為人役上焉者或被外國聘往辦事其次亦多在各國領事署及各洋行充當翻譯我才棄為彼用我用轉需彼才揆諸養才用才之初心似相刺謬若以此而並廢出洋之舉是因噎廢食從此更難儲上品之才矣應如該督所請延致教習數人在廠督課其尤為異等者仍照成案絡繹出洋俾後出更新之法不至絕無聞見至學成回華之學生如所造尚淺仍令再行出洋其業有心得者應令分別有差無差咨報臣衙門聽候調取考驗咨送各督撫酌量位置以昭激勵原奏又稱經費宜籌的款船政經費向由閩海關洋稅每年撥解六十萬按月分解數年前不過解至二三十萬近則並不及二十萬請沿江沿海各省通力合作即以購船之費分年撥解又請如戶部原奏簡派廉幹精駁大員來閩接辦等語臣查船政用款初由閩海關六成項下月三萬兩四成項下月一萬兩其養船經費

則隨時由善後局撥解本無定數光緒二三年以前前兩江督臣沈葆楨前福建巡撫臣丁日昌任內位望較崇隨時將需款爲難情形據實奏明每奉 特旨催解各將軍督撫亦氣誼交孚力籌應付故經費裕而成船多此後船政大臣黎兆棠張夢元裴陰森皆以兩司調管船政不能不事事秉承督撫將軍名爲專管實與司道兼權無異所謂權勢較輕不足振全局擴前功者也所以光緒四五年以後閩海關積欠幾至三百萬兩善後局積欠亦不下百萬兩從前但製木質輪船每年六十萬兩尙可敷用現既責令改造鐵甲鋼甲僱募洋匠一船之費動直百十萬金洋匠薪水費亦不貲斷非月款數萬金所能敷用況此數者又皆不能應手至各省通力合作一層非有一定章程恐亦徒成畫餅可否仰懇 天恩俯念船政爲海防根本較邊防尤爲喫緊 飭下閩海關及該督將每月應解五萬兩並發船各經費仍照光緒二三年以前按月清解倘解不足額請照甘餉邊餉之例由 臣衙門嚴定功過奏明請 旨辦理並飭下南北洋大臣及沿海沿江各督撫應定何項快船中船繪成圖式估價若干奏明由 臣衙門會同戶部指款分明派撥其造不如式以及逾期告成者應請將該大臣及在事人員分別議處果有限內告竣及堅固速率如法者亦准擇尤優獎該督所稱總督事繁勢難兼顧自屬實在情形應請援照舊案 欽派大臣馳往督辦隨時與該省將軍總督南北洋大臣會銜具奏一切兵輪各船統歸節制以重事權 上諭

總理各國事務衙門奏遵議閩浙總督邊寶泉奏查明船政情形請派大員督辦一摺福州將軍裕祿著  
毓充船政大臣船政爲海防根本經前大學士左宗棠等經營締造實事求是卓著成效後因經費支絀  
日漸廢弛現在泰西各國製造日新鐵甲愈堅快船愈速非大加整頓不足以建威銷萌該衙門所議各  
節均極周妥其添置機器招募精於工作之洋人督造新式巨艦卽著照邊寶泉所請行造船物料名目  
不一著裕祿督率在事員匠隨時講究奏明辦理內地煤鐵各礦業經該督委員查勘卽著從速興辦不  
准胥吏劣紳等阻撓以收實效船政學生延請教習數人在廠督課仍照成案出洋其業有心得者咨送  
總理衙門考驗酌量位置經費一項從前積欠過多亟應源源撥解以濟要工著裕祿邊寶泉將閩海關  
等處每月應解五萬兩並養船各經費均照光緒二三年以前每月清解倘解不足額卽照甘餉邊餉例  
由該衙門嚴定功過奏明辦理並著咨行南北洋大臣及沿江沿海各督撫將應定甲船快船繪圖估價  
奏明撥款興辦現在從新整頓船政實於時局大有關係該將軍當破除積習實心實力認真辦理方爲  
不負委任直隸候補道徐建寅熟悉機器情形已由總理衙門電飭該員前赴船政局聽候差遣著裕祿  
察看能否派充提調酌量辦理原摺著鈔給閱看將此諭令知之○癸未諭軍機大臣等董福祥馳奏入  
山搜剿及攻克卡爾岡各情形均悉該提督力疾遍征調度合宜深堪嘉尚迭次出力將弁著俟西寧全

境肅清擇尤酌保○乙酉諭李秉衡奏續查河員辦事處偏貽誤工從嚴參辦等語已革副將徐天慶辦理鎮壩並未用土填實已革知縣張學易現錢買土亦有不實不盡該二員前因趙家茶園漫口業經降旨革職徐天慶著永不敘用並不准投効軍營張學易著不准留工以示懲儆○諭福潤奏安徽潛山縣五月間陰雨過多蛟洪陡發以致縣境被淹情形較甚現辦籌撫等語覽奏實深軫系卽著福潤並派委員籌辦賑撫並設法疏消積水毋令災民失所○丙戌諭張之洞等奏湖北應山等縣被水情形分別辦理一摺五月間湖北應山孝感羅田三縣蛟水猝發田廬被淹應山縣並查有淹斃人口情事已經該督等支款派員前往賑撫卽著督撫委員會同應山縣官紳撫恤災黎認真籌辦並設法疏消積水毋令災民失所其孝感羅田兩縣被災情形並著迅速查明辦理○依克唐阿奏奏省鑄造大小銀圓購定各種機器鍋爐所需價銀別無款項可籌請將此項購價並將來安設機爐修蓋房屋諸費暫由奏省各項稅捐項下每兩抽提五分核實動用下戶部議奏○鹿傳霖奏贛對番官糾眾越境滋擾盤踞章谷土司官寨前經臣將籌辦情形奏明在案茲據籌餉局司道詳稱昨據派查辦明瞻朱章夷案候補知府羅以禮稟報先派知縣穆秉文隨帶差弁二名漢土兵各十名前往開導而瞻番仔仲已先到盤踞羅以禮卽督率勇營復札飭明正土司派土兵一百名并由阜和協副將陳均山添派都司劉炳勳管帶本營兵丁

境肅清擇尤酌保○乙酉諭李秉衡奏續查河員辦事虛偽貽誤要工從嚴參辦等語已革副將徐天慶辦理鑲埽並未用土填實已革知縣張學易現錢買土亦有不實不盡該二員前因趙家茶園漫口業經降旨革職徐天慶著永不敘用並不准投効軍營張學易著不准留工以示懲儆○諭福潤奏安徽潛山縣五月間陰雨過多蛟洪陡發以致縣境被淹情形較甚現辦籌撫等語覽奏實深廑系卽著福潤並派委員籌辦賑撫並設法疏消積水毋令災民失所○丙戌諭張之洞等奏湖北應山等縣被水情形分別辦理一摺五月間湖北應山孝感羅田三縣蛟水猝發田廬被淹應山縣並查有淹斃人口情事已經該督等支款派員前往賑撫卽著督撫委員會同應山縣官紳撫恤災黎認真籌辦並設法疏消積水毋令災民失所其孝感羅田兩縣被災情形並著迅速查明辦理○依克唐阿奏奉省鑄造大小銀圓購定各種機器鍋爐所需價銀別無款項可籌請將此項購價並將來安設機爐修蓋房屋諸費暫由奉省各項稅捐項下每兩抽提五分核實動用下戶部議奏○鹿傳霖奏贛對番官糾眾越境滋擾盤踞章谷土司官寨前經臣將籌辦情形奏明在案茲據籌餉局司道詳稱昨據派查辦明贛朱章東案候補知府羅以禮稟報先派知縣穆秉文隨帶差弁二名漢土兵各十名前往開導而贛番仔仲已先到盤踞羅以禮卽督率勇營復札飭明正土司派土兵一百名并由卑和協副將陳均山添派都司劉炳勳管帶本營兵丁



一百名會同起程於四月二十五日出關馳往查辦探聞該番又添調番兵意圖抗拒查爾本係五土司今朱滿土司因爭獎之案已投附瞻番章谷土司正在爲其所脅依違兩可我軍單薄後派之營趕到需時竊恐各土司皆爲所脅更難措手當今把總盧鳴揚駐調麻吉孔撒白利三土司各派土兵五百名自備鎗械飭令分紮各要隘給予行糧聽候調遣以收其心令之助力官兵免爲瞻番所脅所有支給土兵行糧應請作正級銷等情所有添調漢土官兵名數及支發行糧緣由詳請奏咨前來臣覆查無異除咨部外理合附片具陳 上諭軍機大臣等鹿傳霖奏瞻對番官不服開導現添派營勇土兵分紮要隘等語該番意圖抗拒難保不啟兵端如果各土司皆爲所脅辦理更形棘手並著該督嚴飭驛以禮等嚴加防範妥爲辦理所有支給各土兵行糧准其作正開銷將此由四百里諭令知之○丁亥諭軍機大臣等有人奏藩司貪黷據實糾參一摺據稱江寧藩司瑞璋於補授泰州知州等情均以貽成釐局委員行賄而留差者不可勝計縱容門丁解大劣幕潘誼齋等扶同招搖伊子文弼任意閑游未能約束請飭查辦等語著趙舒翹按照所參各節確切查明據實具奏毋稍徇隱原摺著鈔給閱看將此諭令知之○戊子劉坤一奏南洋海防添購江清江平江泰江順崇安大小輪船五艘所有各船馬力喫水丈尺及所配員名銀數開具清單請 飭部查照施行下部知之○總理各國事務衙門奏准軍機處鈔交署南洋大

臣張之洞奏出使經費一欸除江海一關留存外餘仍請解江甯藩庫一片光緒二十二年正月二十五日奉 硃批該衙門知道欽此 臣等查原奏內稱此項經費該關向係發商生息一有虧折多方拖延既改歸甯庫不宜更易良法徒便私圖各節自係為慎重庫欸起見惟查光緒二十年六月間南洋大臣劉坤一來咨以江海關支銷出使各銀兩暨文報電報各局費欸繁時促事事向藩庫提解核放輾轉需時且六成洋稅洋藥釐金欸收不敷墊放竭蹶萬分慮致耽延等因經 臣衙門於上年十月間奏請仍照向章將此欸按結解歸江海關存撥欽奉 俞允欽遵辦理在案本年正月間並據江海關道黃祖緒電稱向來各關匯解使費到滬號商用滙票上兌可省批估一切雜費若隨甯交收後再將現銀解滬勢不能不逐一批估以便滙市流通一經批估不惟平色短少添補多所推卸即估費亦難籌給等語 臣等公同商酌存甯存滬同一庫儲與其輾轉解兌致多虛耗為若循章存放較省周折若論出入虧挪積習凡寄筭鑰者皆宜慎防豈惟江海一關為然亦豈惟出使經費為然要在收藏得人不論時地遠近應請 飭下南洋大臣仍遵光緒二十一年十月十四日 諭旨將江甯藩庫已收未收使費一欸一律撥歸江海關存儲備放并由 臣衙門行知各省關仍遵向章辦理張之洞所請將使費改解甯庫之處應請毋庸置議至原奏內稱今日據報該關積存之數是否全有實銀尚不可知此事人人皆知一節事關庫儲重要

張之洞既未及澈查應由本任南洋大臣劉坤一揀派司道大員會同江海關道將歷任存放欸目有無虧短切實結報如有以上積存不實等情請 旨嚴追賠補以重要欸而儆將來得 旨如所議行○己丑以楊儒爲左副都御史○庚寅 萬壽聖節 上御乾清宮受賀○長順奏奴才於光緒十七年九月初三日奏請創修吉林通志於十月初四日奉 硃批知道了欽此遵卽由省城書院設局興修時閱三年纂述粗畢會以馳驅戎馬文字未遑自回任以來乃克重加校定謹繕清本恭呈 御覽奴才竊維古者小史掌邦國之志外史掌四方之志而土訓誦訓得以地圖地俗地事入告以施其政誠以一方之掌故爲一方之人心風俗所繫經緯條貫藉資考鏡非徒以備冊府之藏已也吉林爲國家肇基重地三百餘年來師武臣力震耀寶區而文獻之徵缺焉未備遂使纂輯之士無所取裁惟乾隆四十二年 欽定滿洲源流考四十八年 欽定盛京通志實爲今日之樞輿道光四年吉林主事薩英額撰吉林外紀光緒十二年前特用知縣曹廷杰撰東三省圖說亦稍資修纂之考證至若前山西布政使林壽圖所纂東錄但鈔撮滿洲源流考多失本意無所發明前湖北布政使黃彭年著有東三省邊防考略前陝西道監察御史朱一新著有三省地圖考證則皆未見其書但聞其目此外紀述是方之事更無專書惟於羣籍數千百卷之中剽取而出以故頗費日力艱於成功蓋慮省之志多成於因而吉林之志實出於創其

爲艱易較然可知故前將軍希元暨升任山東鹽運使前分巡道豐仲泰皆擬興修未克就緒職是故也  
奴才抵任後乃與升任駐藏幫辦大臣前分巡道訥欽妥籌經費酌定章程搜討故事博加採訪延上元  
貢生顧雲並委吉林補用同知楊同桂主其事而郵寄京師請翰林院編修李桂林總成之且校勘烏焉  
再四易稿僅乃成書凡爲卷百十有大分裝四匣並輿圖一匣隨摺進呈伏望 聖慈賜賜觀覽於以察  
地方之隘塞而深思乎 祖宗創業之艱難則愚臣守土之責庶藉以稍盡焉抑更有請者昔宋司馬光  
撰資治通鑑既經進御復知輒暗以未奏不敢輒改今奴才纂是書極知疏漏又繕成後續有所得亦頗  
惜其缺遺擬再與澈始終詳加校正刪益之抽換之畫一之整齊之期極精詳俾臻完善不敢擅便合先  
聲明如蒙 俯允修改則他日刊成之本與今日繕成之本不免微有異同所冀免蹈司馬光之所不足  
奴才幸甚是書幸甚謹聞○壬辰 上詣 大高殿 壽皇殿行禮○賜鎮國將軍載瀛第二子名溥儀  
○癸巳劉樹堂奏豫省銀錢錢貨請設官錢局以平市價下戶部知之